

# ANG IKADUHANG SELYO



Maayong gabii, mga higala. Manindog kitang tanan sa makadiyut lang para sa pag-ampo, kung mahimo.

<sup>2</sup> Among Langitnong Amahan, nagkatigum kami pag-usab niining balaan nga panagtigum, karong gabhiona, diha sa panerbisyo sa Ginoo. Ug nagsaad Ka nga kung asa man kami magakatigum nga magkauban, duha o tulo ra kanamo, mamaania Ka sa among taliwala. Ug makasigurado kami nga ania Ka, tungod kay nagakatigum man kami sa Iyang Ngalan.

<sup>3</sup> Karon nagaampo kami, Amahan, nga—nga moanhi Ka karong gabhiona ug ablihan kining Ikaduhang Selyo para kanamo. Ug maingon sa—sa gisulti sa magbabalak, nga gusto niyang motan-aw luyo sa tabil sa panahon. Ug mao kana ang among tinguha, Ginoo, nga—nga makatan-aw lamang ngadto sa luyo ug makita kung unsa man ang anaa sa unahan. Ug nagaampo kami nga ang Cordero nga gipatay, moanhi sa among taliwala karon ug ablihan ang Selyo, ug—ug ipadayag Kini nganhi kanamo, ang mga butang nga kinahanglan namong makita.

<sup>4</sup> Adunay pipila dinhi, Ginoo, nga wala pa nakasulod niining halangdong pagpakig-fellowship kang Cristo. Ginaampo namo nga, niining gabhiona, nga himoon na nila kanang pang-Eternal nga desisyon, og mapuno sa Espiritu sa Dios.

<sup>5</sup> Kung aduna ma'y mga masakiton, Amahan, ginaampo namo nga ayohon Mo sila. Adunay daghang mga panyo nga napahimutang dinhi nga ginapandongan ko sa akong mga kamot, sa pagdumdum sa—sa Biblia, mahitungod ni San Pablo, kon diin nanagkuha sila gikan sa iyang lawas og mga panyo ug gagmay'ng mga panapton. Mibiya sa mga tawo ang mahugaw'ng mga espiritu, ug nangaayo sila.

<sup>6</sup> Makita namo ang haduol na nga Pag-abot sa Ginoo. Hingsayran 'sab namo nga ang panahon nagakahiduol na. Kini nga mga butang mibalik na pag-usab ngadto sa Iglesia, human sa dise-nuebe ka gatus ka tuig.

<sup>7</sup> Karon ginaampo namo, Amahan, nga itugot Mo kining mga butang nga among ginahangyo. Lig-ona ang Imong alagad, ug tabangi ang Imong mga alagad sa bisan asa, Ginoo, ug ilabina kaming mga nagkatigum dinhi karong gabhiona, nga mahimo namong madawat ang Pulong. Nagapangamuyo kami sa Ngalan ni Jesus. Amen.

<sup>8</sup> Pagkaanindot gayud nga makabalik sa balay sa Ginoo pag-usab niining gabhiona. Ug kahibalo ko nga daghan kaayo kaninyo ang nagatindog, ako—pasayloa ko tungod niana, apan

halos wala na gyud kami'y mahimo pa. Gihimo na namo—namo ang—ang iglesia nga sama sa . . . gipadak-an na kini diin mapalingkod na namo ang tulo o upat, tulo ka gatus o kaha upat pa ka gatus ang makasulod. Apan sa espesyal nga mga panagtigum nga sama niini, kini—nagadala man gud kini og mas daghan pa nga mga tawo.

<sup>9</sup> Karon, oh, nagkaaduna ako og maanindot nga kahigayonan, sa pag-ampo, ug pagtuon niining—niining Mga Selyo. Nagalaum ko nga kamong tanan, usab. [Nagaingon ang kongregasyon, “Amen.”—Ed.] Ako—sigurado ko nga mao usab kamo. Ug kung Kini ingon ka mahinungdanon kaninyo sama sa kung unsa Kini ka mahinungdanon kanako, sigurado gayud nga . . . nagkaaduna kamo og maanindot nga kahigayonan. Ug aduna ko'y . . .

<sup>10</sup> Gusto kong tawgon ang usa ka higala kong babaye, pagkahuman sa panerbisyo. Ug iyang adlaw'ng-natawhan karon. Siya'y dose anyos na ang panuigon karong adlaw, si Sarah, ang anak kong babaye. Ug sunod, pagkahuman, sa sunod adlaw, kinahanglan kong magtawag na usab, tungod kay adlaw'ng-natawhan kana ni Becky.

<sup>11</sup> Ug karon, niining gabhiona, tun-an nato kining Ikaduhang Selyo. Ug para sa unang upat ka Mga Selyo aduna pu'y upat ka mga mangangabayo. Ug sultihan ko kamo, nga niining adlaw may butang nga nahitabo pag-usab. Ug, ako—ako, usa ka butang nga akong . . . Miadto ko ug gikuha ang daan na nga sinulat nga aduna ako, nga ako nang giwali, kaniadto pa, ug milingkod lang ko didto. Ug nahunahunaan ko, “Bueno, ako—gihimo ko man ang labing maayo nga mahimo ko.” Ug daghang mga manunulat ug mga ingon-niana, ug nakahunahuna ko, “Bueno, magabasa ako sa makadiyut, ug motan-aw ug tan-awon *kini* ug *kana*.” Ug sa kalit lang, adunay butang nga nahitabo, ug pagkalahi na kaayo niini. Miabot kini nga lahi na. Pagkahuman gikuha ko dayon ang akong lapis, ug misugod sa pagsulat sa ingon kapasas nga mahimo ko, samtang atua pa Siya.

<sup>12</sup> Oh, butang kini nga nahitabo mga tunga sa oras pa lang ang milabay. Giingnan ko si Igsoong Wood, sa pagpaingon namo dinhi, mga pipila pa lang ka minuto ang milabay. Usa lamang ka butang, kabalo mo. Kabalo mo, pagkadaghang mga butang ang nahitabo, nga dili mo gayud mahimong hisgotan, kabalo na mo. Apan usa ka butang ang bag-ohay lang nahitabo nga nakatabang gyud og daku kanako.

<sup>13</sup> Aduna ko'y usa ka higala dinhi sa kung asa man sa bilding. Siyempre, kamong tanan mga higala man nako. Kini—kini nga igsoon mao si Igsoong Lee Vayle. Usa siya ka bililhon nga igsoon, ug usa ka tinuod nga magtutuon sa Kasulatan. Si Dr. Vayle usa siya ka Baptist nga adunay Espiritu Santo. Ug siya'y usa ka . . . Dili ko kini ginasulti ingon nga pagdayeg, ginasulti ko lang kini tungod kay nagatoo ko niini. Sa hunahuna ko siya'y

usa sa pinakabatid nga mga magtutuon nga nailhan ko, sa laray namo. Ug bag-o lang ko niyang gipadalhan og gamay'ng sinulat dinhi, ug gipadala niya kini pinaagi ni Billy. Ug halos dili kini mabasa ni Billy, para kanako. Ug siguro. . . Wala ko na nabasa kini og utro, apan isulti ko lang kung unsay gisulti niya dinhi. Ug basahon ko lang kini, Igsoong Vayle, kung ania ka man dinhi. Nabasa ko kini mga unom na ka bulan ang milabay.

14 “Dili ko sigurado,” ang ingon niya. “Igsoong Bill, dili ko sigurado, apan nagatoo ko nga si Polycarp kaniadto usa ka estudyante ni San Juan.” Husto kana. Mao gyud. “Sa hunahuna ko si Irenaeus usab usa ka estudyante ni—ni Polycarp.” Husto kana, eksakto gayud. “Miingon si Irenaeus, ‘Si Jesus mobalik—mobalik sa diha nga nakasulod na ang kaulahiing pinili nga miyembro sa Lawas ni Cristo.’”

15 Si Irenaeus kana, mga upat ka gatus ka tuig na . . . human sa pagkamatay ni Cristo. Ingon niya, “Sa diha nga miabot na kining kaulahiing kapanahonan. . .” Karon, kana sa wala pa ang—ang Nicaea Council. Kamong mga ania dinhi, nga nagabasa sa—sa . . . nagatuon sa Kasulatan, ug nagatuon sa . . . ang buut kong ipasabot, nagatuon sa kasaysayan sa Biblia, makaplagnan ninyo kana sa wala pa . . . sa wala pa ang Nicaea Council. Ug sa hunahuna ko nga sa unang libro o sa ikaduhang libro, inyong—inyong makaplagnan kana. Ug karon, nakita niya kini, daghang mga katuigan na ang milabay, nga giingon niya, “Pag ang katapusan, katapusang—katapusang pinili, kanang usa nga pinili.”

16 Ang dahum sa mga tawo nga ang pagpili usa ra ka butang nga—usa ra ka butang nga gihimo dili pa lang dugay. Grabe! Usa kana sa pinaka-karaan nga mga pagtulon-an nga aduna kita: pagpili ug pagtawag. Ug mao nga si Irenaeus, sigurado, og ang tinuod nga mga magtutuon sa Kasulatan, dugay nang nagatoo sa pagpili.

17 Ug busa si Irenaeus mao’y usa sa—sa mga manulonda sa kapanahonan sa iglesia, sumala sa atong nahibaloan, og sumala sa atong natun-an. Nagatoo kita. Siyempre, karon, kining tanan mga tinago gayud. Ania kining tanan, mismo, nakatago mismo niining Mga Selyo, nakita n’yo. Ug igapadayag ra ang mga niini sa kaulahiing adlaw. Kung unsa nga nagsugod kini kang Pablo, ug—ug Irenaeus, ug Martin, ug uban pa, hangtud sa, ug hangtud na sa katapusang kapanahonan.

18 Ug, karon, nagasalig kita karon nga panalanginon kita sa Ginoo sa atong pagpaningkamot karong gabhiona. Karon gikan na ’ta . . . Sa Unang Selyo, nagustohan ko gayud kana. Ang Unang Selyo, ang mga panalangin nga anaa Niini, para kanako!

19 Ug karon ako—dili ko gusto nga langanon mo pag-ayo. Apan, nakita n’yo, ako—mobiyahe na usab ko, sa pipila ka gabii, ug

human nga matapos kini. Ug medyo kinahanglan 'sa natong mag-antus sa makadiyut. Ug ginapasalamatan ko . . .

<sup>20</sup> Nakita ko si Igsoong Junior Jackson nga nagatindog dinha. Ako . . . Ug mora og nakita ko usab si Igsoong Ruddell, kaganina, dinhi sa kung asa man. Ug sila nga mga kaigsoonan, kana'y igsoon nato nga mga iglesia nga gikansela ang ilang mga panagtigum, ug aron makaanhi. Ginapasalamatan gayud nato kana. Ug nakita ko si Igsoong Hooper, nagatoo ko, nga nagatindog siya sa may bungbong dinha, taga Utica, didto ang iyang iglesia. Ug ginapasalamatan gayud namo ang tanan ninyong maayong pagpakigtimbayayong niini.

<sup>21</sup> Bueno, sa miaging gabii, sama sa kanunay natong ginatinguha, sa pagtudlo mahitungod sa—mahitungod sa Mga Selyo, ginatudlo nato kini sa mao rang paagi nga gihimo mo sa—sa—sa mga kapanahonan sa iglesia. Ug sa nahuman na nato ang pagtudlo sa kapanahonan sa iglesia, ang kaulahiing higayon nga gi-drowing ko ang mga niini dinhi sa—sa pulpito, diha sa pisara, pila man ang nakahinumdom sa kung unsay nahitabo? Mikanaug Siya mismo, mianha sa bungbong, sa usa ka Kahayag, ug gi-drowing kini, Siya Mismo, dinha mismo sa bungbong, sa atubangan natong tanan. Ang Manulonda sa Ginoo mitindog gyud dinhi mismo atubangan sa pila ka gatus nga mga tawo.

<sup>22</sup> Ug karon Siya'y—Siya'y nagabuhat og usa ka butang nga supernatural kaayo usab, karon, ug busa nagalaum kita og gamhanang mga butang. Wala kita masayod . . . Hulati lang ninyo kanang—kanang dakung pagpaabot, nga wala ka masayod sa kung unsa ma'y sunod nga mahitabo, kabalo na mo, basta—basta gahulat ka lang. Karon, pagkagamhanan sa Dios nganhi kanato, ug pagka-kahibulongan gayud! Ginapasalamatan gayud nato Siya!

<sup>23</sup> Karon, ang una ug ika-2 nga bersekulo, basahon ko Kini, aron maghatag og diyutay'ng basihanan. Ug pagkahuman basahon nato ang ika-3 ug ika-4 nga bersekulo, para sa Ikaduhang Selyo. Ug dayon ang ika-5 ug ika-6 nga bersekulo mao'y sa Ikatulong Selyo. Ug ang ika-7 ug ika-8 mao'y sa . . . Duha ka bersekulo sa matag mangangabayo. Ug karon gusto ko nga matikdan ninyo kung unsa nga kini nga mga mangangabayo . . . Sa niining maluspad nga kabayo, siguro . . . Ania siya, nga padayong nagausab samtang siya nagapangabayo.

<sup>24</sup> Ug dayon kanang bantugang, kaulahiing Selyo nga pagaablihan, kon itugot sa Dios, pagkasunod Dominggo na sa gabii! Nga, sa dihang nahitabo kana, aduna lamang, og bugtong butang nga nahitabo, “mao ang kahilum diha sa Langit sulod sa tunga sa oras.” Hinaut nga tabangan kita sa Dios.

<sup>25</sup> Karon basahon ko na ang ika-3 nga bersekulo karon.

*Ug sa pag-abli niya sa ikaduhang selyo, nadungog ko ang ikaduhang buhing binuhat nga nagaingon, Umari ka ug tan-awa.*

*Ug migula ang lain na usab nga kabayo... (ika-4 nga bersekulo)... nga mapula: ug ang nagkabayo niini gitugotan sa pagwagtang sa pagdinaitay gikan sa yuta, ... aron ang mga tawo magpinatyanay ang usa sa usa... ang mga tawo magpinatyanay ang usa sa usa: ug siya gihatagan og usa ka dakung espada.*

<sup>26</sup> Karon, ang mysteryoso nga butang karon, sa diha nga ang—ang Mananap miingon kang Juan, “Umari ka lamang ug tan-awa.” Ug wala niya nakita kung unsa gyud kadto. Ang nakita lang niya usa ka simbolo. Ug kana nga simbolo, ang hinungdan nga kini... Ingon siya, “Umari ka, tan-awa,” apan ang nakita niya usa ka simbolo, nga iyang ilarawan kini ngadto sa iglesia, sa paagi aron tan-awon nila; hangtud nga moabot kini sa katapusang kapanahonan, ug dayon pagaablihan na ang Selyo.

<sup>27</sup> Karon, nasabtan na kana sa matag usa karon, kita n’yo, nga ablihan ang Mga Selyo. Ug wala ba mo malipay nga nagakinabuhi kita niini nga adlaw? [Nagaingon ang kongregasyon, “Amen.”—Ed.] Nga, kita n’yo, dili lamang kana, mga higala, apan hinumdumi gyud ninyo kanunay, nga sa miaging Dominggo sa buntag, kon diin ang tibuok niining butang gibasi diha sa, kayano! Kita n’yo? Yano, og mapainubsanon, sa ingon-anang paagi kini nagakahitabo mao nga nagapadayon lang sa gihapon ang mga tawo ug wala man lang nasayod nga nagakahitabo na diay Kini.

<sup>28</sup> Ug, hinumdumi, nga nagahulat kita sa Pag-abot sa Gino, sa unsa mang oras. Ug sa dihang kita... nakahimo ako og usa ka pahayag, nga tingali’g ang Pagsakgaw mahitabo sa mao ra gihapon nga paagi. Mahitabo kini, mahuman na lang, ug wala gyu’y ni usa ang makahibalo og unsa man mahitungod niini. Moabot ra Kini nga sama niana. Kita n’yo? Ug kasagaran... Baliki lang ninyo ang Biblia ug tan-awa kung unsa nga ang mga ingon niini basta na lang nagakahitabo nga sama niana. Kita n’yo?

<sup>29</sup> Bisan ingon na ka pagkadakung butang sama sa pag-abot ni Ginoong Jesus kaniadto, walay si kinsa man ang nasayod niini. Abi lang nila, “Kanang salikwaut, nga Tawo.” Miingon ang mga iglesia, “Usa lang kana ka panatiko. Atong... Siya’y buang-buang.” Ingon pa, “Usa Siya ka tawong wala sa hustong pangisip.” “Nasayod kami nga wala Ka sa hustong pangisip.” Ang *wala-sa-hustong-pangisip* nagakahulogan og “buang-buang.” “Nasayod kami nga adunay yawa Kanimo, ug nagpa-buang kini Kanimo. Ug tudloan Mo pa kami? Sa dihang, natawo Ka man lang, nga ilehitimo. Kami... Natawo Ka tungod sa pagpakighilawas sa Imong ginikanan nga wala pa naminyo.

Naninguha Ka pang tudloan ang mga kalalaken-an nga sama namo, ang mga sacerdote, ug uban pa, sa templo?” Bueno, grabe, usa man gyud kadto ka insulto para kanila.

<sup>30</sup> Sa dihang miabot na si Juan, nga gihisgotan na kaniadto pa, sa tanang mga kapanahonan, gikan kang Isaias hangtud kang Malaquias. Kana’y dose ka gatus. . . o pito ka gatus ug dose ka tuig, nakita na siya sa mga propeta, nga siya magaabot. Ang tanan nanaghulat na para kaniya nga moabot, nanagpaabot nga moabot siya sa unsa mang oras. Apan tungod sa paagi nga miabot siya, nagwali lang siya ug gibuhat ang iyang katungdanan, ug miadto na sa Kahimayaan.

<sup>31</sup> Ug bisan ang mga apostoles wala gani nasayod bahin niini, tungod kay gipangutana man nila si Jesus. Ingon nila, “Karon, kung—kung ang Anak sa tawo moadto na sa Jerusalem, og ang tanan na niining mga butang, nga Siya ihalad na,” miingon, “nganong gisulti man sa Kasulatan nga ‘moabot una si Elias’?”

<sup>32</sup> Ang ingon ni Jesus, “Miabot na siya, ug wala kamo mahibalo niini. Ug gibuhat na niya eksakto kung unsay gikasulti sa Kasultan nga pagabuhaton niya. Ug gibuhat usab nila kaniya kung unsa ang nahisulat na.” Kita n’yo? Ug wala gyud nila masabtan kadto. Ingon Siya, “Si Juan kana.”

Ug, pagkahuman niana, “Oh!” Kita n’yo, sila—nahigmata sila, niadto. Sila. . .

<sup>33</sup> Ug sa, bisan, sa kaulahian, human nga Iyang—Iyang gibuhat tanan kadto nga mga butang, ug ang mga ilhanan nga Iyang gipakita sa mga tawo, ug gitawag pa gani sila. Miingon, “Kinsa ba ang makahukom Kanako og silot tungod sa sala, ang dili-pagtoo? Kung wala Ko gibuhat eksakto kung unsa ang gisulti sa Kasulatan nga pagabuhaton sa Akong katungdanan sa dihang moabot Ako sa yuta, nan ipakita n’yo Kanako kon diin Ako nakasala. Kita n’yo? Dayon Akong—ipakita Ko kaninyo kung unsa gyud kamo, ug tan-awon nato kon ginatoohan n’yo ba kini, o wala.” Kita n’yo? Puede man unta Niya sila balikan ug ingnan, “Angay unta nga mitoo kamo Kanako sa dihang miabot Ako.” Wala man sila nagtoo, kita n’yo, nasayod gyud sila nga wala gyud sila’y mahimong itubag, niana. Apan ingon Siya, “Kinsa ba kaninyo ang makapasangil Kanako og dili-pagtoo? Kita n’yo? Dili ba gituman Ko lang kung unsa kadto?”

<sup>34</sup> Ug bisan ang mga apostoles, nga nagauban-uban kaniadto, nangapandol. Nasayod kita kung unsa ang gisulti sa mga Kasulatan. Dayon sa katapusan, sa kaulahian, miingon sila, “Karon nagatoo na kami. Nagatoo kami nga walay ni usa ang kinahanglang mosulti pa Kanimo, tungod kay nasayod Ka sa tanang mga butang.”

<sup>35</sup> Karon, gusto ko unta mga makita kaniadto ang Iyang nawong. Siguradong mitan-aw Siya kanila, miingon, “Bueno, nagatoo na ba kamo karon? Sa katapusan misantop ra gyud

kaninyo.” Bueno, dili man unta ingon-niana kadto, siguro, hangtud niadtong panahona lang, nakita n’yo. Ug ginabuhat lang sa Dios ang tanang butang sa husto, kabalo mo. Ako—ginahigugma ko Siya tungod niana.

<sup>36</sup> Apan ginahunahuna lang nato karon ang atong kapanahonan. Kay, kung hisgotan ko pa ang mahitungod niana, dili gyud ’ta makadangat niining Mga Selyo, man lang.

<sup>37</sup> Ug karon, hinumdumi, daghan kaayo ang nadawat kong mga hangyo para sa pag-ampo sa mga may sakit. Ug nagaampo ko para sa . . . sa tanang panahon, para sa matag hangyo nga akong madawat, ug para sa mga panyo ug mga ingon-niana. Ug kung matapos na nato kining Mga Selyo, hangtud sa kaulahiing Selyo, sa Dominggo sa buntag atong . . . Kung kabubut-on sa Ginoo, buut natong magpahigayon og usa ka maayo nga kinaraang panerbisyo sa pagpang-ayo dinhi, kabalo na mo, kon diin igahin gyud nato ang tibuok buntag para sa pag-ampo sa mga may sakit. Ug ako—sigurado ko nga mamahimo kanang usa ka talagsaon nga panagtigum para sa pagpang-ayo. Kita n’yo? Nabati ko lang ang ingon-ana, nakita n’yo. Ug busa, dili ingon nga talagsaon gayud, apan siguro medyo talagsaon lang para sa uban, kita n’yo, ang buot kong ipasabot.

<sup>38</sup> Karon, pagkahalangdon sa grasya sa Dios, nga ipadayag Niya ang Iyang mga tinago nganhi kanato sa niining adlaw! Karon, nagatoo kitang tanan nga nagapuyo na kita sa kaulahiing adlaw. Nagatoo kita niana. Ug hinumdumi, nga igapadayag ang mga tinago sa kaulahiing adlaw. Ug unsaon man Niya pagpadayag ang Iyang Pulong, ang Iyang mga tinago? Miingon ang Biblia. Gusto n’yo bang basahon kung asa Niya gisulti kini? Ablihan nato ug tan-awon kung ginaunsa Niya pagpadayag ang Iyang mga tinago.

<sup>39</sup> Karon gusto ko nga basahon ninyo ang Amos. Ablihi n’yo sa Basahon ni Amos, ug gusto kong mobasa kamo sa ika-3 nga kapitulo sa Amos, ug sa ika-7 nga bersekulo. Sige. Basahon ko ang ika-6 nga bersekulo, usab.

*Ang trumpeta . . . patingogon ba sulod sa siyudad, ug ang mga katawohan dili diay mahadlok? mahulog ba lamang ang kadautan sa usa ka siyudad, ug kini sa dili pagbuot sa GINOO?*

*Sa pagkamatuod ang Ginoo . . . dili magbuhat sa bisan unsa, gawas kung ang iyang mga tinago ipadayag niya sa iyang mga alagad ang mga propeta.*

<sup>40</sup> Karon, sa kaulahiing mga adlaw, kita’y . . . Gikatagna na kini kanato nga adunay motungha nga usa—usa ka propeta.

<sup>41</sup> Karon, nasayod kita nga nagkaaduna na kita niini og tanan na nga matang. Karon, nahunahuna ko, human nga mitan-aw ko sa palibot karong gabhiona, ako—nagasulti man diay ko nga adunay mga magtutuon dinhi nga nagalingkod, ug ako—

buot ko nga masabtan unta ko ninyo. Ug kabalo mo, nga nagakaylap kining mga teyp sa kalibutan, kita n'yo, halos sa tibuok kalibutan. Ug gusto ko nga dili kamo, sa unsa mang paagi, maghunahuna nga gapaninguha kong magtudlo sa kung unsa nga matang sa—sa kulto mahatungod sa mga panapton o mga bisti ni Elias. Ug tanan—tanang nianang mga butanga, nagkaaduna na kita og daghan niana. Apan, kabalo mo, kana tanan nga mga butang usa lamang ka pagpasiuna sa tinuod nga butang nga umalabot, aron libogon ang mga tawo.

<sup>42</sup> Kahibalo ba mo nga aduna kita kaniadto og mini—mini nga mga lider nga nanungha, mini nga mga mesias, sa wala pa miabot si Cristo? Dili ba, dili ba ang... Ang magtutudlo niadto nga adlaw, kadtong gamhanan nga magtutudlo, nga si Gamaliel, sa dihang nahisgotan ang—ang pangutana kung angay bang bunalan kadto nga mga kalalaken—an, ug uban pa, ingon siya, “Pasagdi ra sila. Kung iya kana sa Dios, aba, makaplagnan kamong nagabatok sa Dios. Apan kung dili man kana iya sa Dios...” Miingon, “Dili ba usa ka tawo ang mitungha, dili pa lang dugay, ug nadala ang upat ka gatus ngadto sa kamingawan, ug uban pa? Nagkaaduna na kita nianang mga butanga.” Unsa man kana? Ang tanan niana nga pagpasiuna lang sa tinuod nga Butang pagmoabot na Kini.

<sup>43</sup> Karon, kita n'yo, si Satanas man ang nagpatungha niadto. Matikdi n'yo ang pagkamaliputon niining tawhana nga atong ginahisgotan dinhi, si Satanas, kon diin ginabutayag nato siya mismo dinhi; bug-os nato siyang ginahukasan, pinaagi sa mga Kasulatan, ug ginapakita kaninyo kung kinsa siya. Mao kana ang... ang angay'ng pagabuhaton.

<sup>44</sup> Ug, hinumdumi ninyo, wala siya naninguhang mosulod ug ingon nga usa ka komunista, dili ingon niana ang gibuhat ni Satanas. Siya'y usa ka anticristo. “Halos kapareho gayud, nga,” ang ingon ni Jesus, “pagalimbongan ang mismong mga Pinili...” Ug kana Mao ang mga gililong sa niining Mga Selyo, kinsang mga ngalan nahisulat na sa Basahon sukad pa sa pagkatukod sa kalibutan.

<sup>45</sup> Usa siya ka maliputon nga tawo. Ug pagmakita niya kining butang nga nagaabot, umalabot na, nan buhaton niya ang tanang butang nga mahimo niya dinha, aron pugngan kini sa dili pa kini moabot. Nahibalo ba mo nga adunay managpanungha nga mini nga mga cristo sa kaulahiang mga adlaw? Kinahanglan mosunod kana dayon pagkahuman niini, pagkahuman niining halangdong Mensahe nga igawali niining igsoon, nga siguradong moabot gyud, og madihogan sa espiritu ni Elias, dayon.

<sup>46</sup> Ug maalaan nila siya. Magdahum ang uban kanila nga siya mao ang Mesias. Apan direkta siyang moingon, “Dili.” Tungod kay, kinahanglan man kining moabot nga sama ni Juan.



47 Sa panahon ni Juan Bautista kaniadto, sa diha nga mitungha siya didto aron magwali, giingnan siya nila, “Dili ba ikaw ang Mesias? Dili ba ikaw Siya?”

48 Ingon siya, “Dili. Dili gani ako takus bisan sa pagtangtang sa Iyang mga sandalyas. Apan ako—nagabaustimo ko kaninyo sa tubig, apan Siya mao’y magabautismo sa Espiritu Santo.” Ug sigurado kaayo si Juan nga ang maong Mesias anaa na sa yuta, ingon niya, “Anaa Siya sa inyong taliwala, sa kung asa man, karon.”

49 Apan wala niya Siya hiilhi hangtud nga nakita niya kadtong ilhanan nga mikunsad sa maong Mesias. Dayon, pagkakita niya niadtong Kahayag nga mikunsad ug nagbukhad nga sama sa usa ka salampati, ug midan-ag Kaniya, ang ingon niya, “Mao kana Siya. Siya kana.” Apan si Juan lamang ang bugtong nakakita Niadto, kabalo na mo. Si Juan lamang ang bugtong nakadungog sa Tingog. Ang tanang uban pa kanila didto, wala ni usa ang nakadungog Niadto.

50 Apan sa diha nga ang matuod, og tinuod nga alagad moabot na; aduna usab og dungan niini ang tanang pagsundog-sundog, kana’y para libogon ang hunahuna sa mga tawo. Ginabuhat kana ni Satanas. Ug kadtong mga dili makaila kung unsa ang matarung ug dautan, basta na lang sila nagakapandol. Apan ang mga Pinili dili gayud mangapandol; miingon ang Biblia nga dili niya arang malimbongan ang mga Pinili. Ug karon, sa dili pa ang Pag-abot ni Cristo, miingon ang Biblia, “Adunay managpanungha nga mini nga mga cristo, ug magapamahayag nga Cristo, ug moingon, ‘Ania karon, ang mga tawo nagaingon nga anaa Siya sa kamingawan.’ Ayaw ninyo toohi kini. ‘Ania, anaa Siya sa tago nga lawak.’ Ayaw ninyo kini.”

51 “Kay maingon nga ang adlaw nagasidlak gikan sa sidlakan paingon sa kasadpan, mao man usab ang Pag-abot sa Anak sa tawo.” Kita n’yo? Oo, Siya’y—Siya’y—magapakita Siya, ug mamahimo kining usa ka pang-tibuok kalibutan nga butang. Ug karon mamahimo kanang, karon, siyempre, pag masayran nila nga aduna na’y nahitabo, nakita n’yo, dayon sila’y. . . Karon, hinumdumi, nga mahitabo kana dayon pagkahuman sa Pagpauli sa Iglesia, human sa Pagsakgaw.

52 Karon aduna gayu’y mini nga mga pagsundog-sundog, sa tanang panahon, ug dili nato buut nga mahilambigit sa unsa mang butang nga sama niana. Dili, sir.

53 Ug nagatoo ko nga, pagmoabot na ang maong tawo, kining usa nga gipanagna na nga moabot, ginapakita ko lang kini pinaagi sa mga Kasulatan, kana nga tawo kinahanglan mamahimong usa ka propeta. Sigurado gayud. Ug ang kapadayagan sa Dios, tungod kay ang Dios. . . Ang Pulong sa Ginoo nagaabot man sa Iyang mga propeta. Husto gayud kana. Kana’y. . . Ug dili mahimong mausab ang Dios, nakita n’yo.

Kung Siya aduna ma'y mas maayo nga sistema, Iyang—gigamit na unta Niya kini. Apan Siya—aduna Siya'y . . . Gipili na Niya ang pinakamaayo nga sistema sa sinugdan pa lang.

<sup>54</sup> Sama lang nga, mahimo man unta Niya nga pilion ang adlaw aron mao'y magwali sa Maayong Balita. Mahimo pud Niya unta nga pilion ang bulan. Mahimo 'sab Niyang pilion ang—ang hangin. Apan gipili gyud Niya ang tawo. Ug wala gayud Siya nagpili sukad og mga grupo. Usa ra ka tawo! Kita n'yo?

<sup>55</sup> Ug wala gayud sukad og duha ka medyor nga mga propeta nga dungan mitungha sa yuta sa mao rang higayon. Kita n'yo, managlahi ang matag tawo, lahi ang pagkahimo sa matag usa. Kung mahimo lang sa Dios nga makuha ang usa ka tawo, mao lang kana ang gikinahanglan Niya, nga makontrola Niya sa Iyang kamot, mahimo Niya kung unsa ma'y gustohon Niya. Usa ra ang gikinahanglan Niya. Sa mga adlaw ni Noe; sa mga adlaw ni Elias; sa mga adlaw ni Moises.

<sup>56</sup> Daghan ang nanungha kaniadto, sa panahon ni Moises. Kabalo na mo kung unsay gibuhath nila, ug naninguha nga moingon, “Bueno, dili lamang ikaw ang bugtong balaan sa grupo,” ug—ug si Dathan ug—ug si Korah kadto.

<sup>57</sup> Ug miingon ang Dios, “Thimulag lang ang imong kaugalingon. Pagaablihan Ko ang yuta ug lamoyon sila.” Nakita n'yo? Ug—ug busa . . .

<sup>58</sup> Ug sa nanagbagulbol na ang mga tawo. Ingon Siya, “Ako na lang—Ako na lang tapuson ang maong tibuok butang.”

<sup>59</sup> Ug atua si Moises nga giangkong ang puwesto ni Cristo, niadtong tungora, sa pagpahimutang sa iyang kaugalingong diha sa gintang, ug miingon, “Ayaw kana buhata, Ginoo.” Kita n'yo? Ug, siyempre, siya . . . Human nga Iyang gi-ordena si Moises nga buhaton kadto, wala na Niya gisupak si Moises, tungod kay nanglihok na man si Moises nga sama ni Cristo niadtong panahona. Si Cristo kadto nga atua kang Moises. Sa walay duhaduha.

<sup>60</sup> Karon, malipayon kaayo kita niining panahona nga ginapadayag sa Dios ang Iyang Kaugalingon kanato. Ug nagatoo ko nga ang halangdon nga Adlaw nagsugod pa lang nga nagabanag-banag, og nagasubang. Nagsugod na sa pagpangidlap ang mga Kahayag. Ang mga langgam sa paraiso nagsugod na sa pag-awit diha sa kasingkasing sa mga balaan. Nasayod sila nga dili na gyud magdugay karon. Aduna gyu'y butang nga mahitabo, nga kinahanglan gayud. Busa kung “Dili Siya magabuhath og unsa mang butang . . .”

<sup>61</sup> Karon, ang tanang Kasulatan dinihogan. Ang mga Kasulatan kinahanglan bug-os gyud nga mao ang Kamatuoran. Wala na'y uban pa nga paagi. Dinha ako wala miuyon sa atong mga higala, ang iglesiang Katoliko. Nagatoo ko nga dili Kini gisulat sa kung kinsa lang nga tawo. Nagatoo ko nga dinihogan

Kini sa Balaang Espiritu. Ug ang tanan niining gagmay'ng mga butang nga gipangdugang, nga gisulayang idugang ngadto Niini; namatikdan ba ninyo, nga misangko lang, sa pagpalagpot sa matag usa niini.

<sup>62</sup> Ug kining matuod, og tinuod nga mga Kasulatan nagakatakdo gayud, sa usa'g usa, hangtud nga—nga wala gyu'y panagsumpaki niini, wala gyud bisan asa. Ipakita kanako ang usa kabuok nga literatura nga mahimong—nga mahimong mosulat og usa ka bersekulo, halos, nga dili ginassumpaki ang kaugalingon niini, o kaha mosulat—mosulat og usa ka bersekulo, o duha. Ug wala ginassumpaki sa Biblia ang Kaugalingon Niini, sa bisan asa. Nadungog ko na ang tigulang mga kritiko nga moingon niana, apan aduna ko'y gitanyag kaniya sa dugay nga panahon, nga ipakita kanako kung asa man kana. Wala gyud kana dinhi. Tungod lang kana nga nalibog gayud hunahuna sa tawo. Dili nagakalibog ang Dios. Nasayod Siya sa kung unsay ginabuhat Niya. Nasayod gyud Siya.

<sup>63</sup> Tan-awa, kung pagahukman kaha sa Dios ang kalibutan pinaagi sa usa ka iglesia, sama sa ginaingon sa iglesiang Katoliko nga ingon-ana kono kini, bueno, kung ingon-niana unsa man kana nga iglesia? Tan-awa lang ninyo ang mga kaiglesihan nga aduna kita sa karon. Aduna kita'y sobra sa siyam ka gatus, nga nagkalainlaing organisasyon sa mga iglesia. Karon unsaon... Ang usa nagatudlo og *ingon-niini*, ug ang usa og *ingon-niana*. Grabe nga kalibog, kung ingon-ana man, buhaton ra ni bisan kinsa ang unsa mang butang nga gustohon nila, dayon padayon ra mo niana sa gihapon. Kinahanglan aduna gyud ang Dios og usa ka sukaranan, ug kana mao ang Iyang Pulong.

<sup>64</sup> Sa pagpakig-istorya ko... Dili ingon nga pagpangdaut sa Katoliko, ha, tungod ang—ang Protestante ingon man usab ka dili-maayo. Apan sa pagpakig-istorya ko sa usa ka pari, ingon siya, “Mr. Branham,” ang ingon niya, “Anaa ang Dios sa Iyang iglesia.”

<sup>65</sup> Ingon ko, “Sir, anaa ang Dios sa Iyang Pulong. Ug Siya mao ang Pulong.” Oo, sir.

Ingon siya, “Bueno, Siya'y anaa... Dili-masayup ang iglesia.”

<sup>66</sup> Ingon ko, “Wala Niya gisulti kana. Apan ang ingon Niya nga dili-masayup ang Pulong.”

<sup>67</sup> Ingon siya, “Bueno, ginatudlo man namo kaniadto ang bautismo sa ingon-ana nga paagi, ug uban pa.”

Ingon ko, “Kanus-a man?”

Miingon, “Sa kaniadtong unang mga panahon.”

Ingon ko, “Ginaangkon mo diay nga ang iglesiang Katoliko kadto?”

Ingon siya, “Oo.”

68 Ingon ko, “Kung ingon-ana, Katoliko ako, ang kaniadto nga Katoliko. Nagatoo ko sa mga kaniadto nga pamaagi. Kamong mga tawo sa karon gilamukat lang ninyo ang tanan Niini, ug halos wala na sa Kasulatan ang inyong ginatudlo. Nagapangamuyo ngadto sa mga kababayan-an ug ngadto sa patay na nga mga tawo, ug tanan na niining uban pang mga butang, ug, oh, aba, ang dili-pagkaon-og-karne, ug, oh, wala na ko kahibalo kung unsa pa, kita mo.” Ingon pa ko, “Pangitaa kana sa Kasulatan para kanako.”

69 Ingon siya, “Dili man kana kinahanglan nga maanaa dinha. Basta ginaingon lang sa iglesia nga ingon-ana, mao na kana. Walay diperensiya kung unsa ma’y ginaingon Niana, mas importante ang sulti sa iglesia.”

70 Ingon ko, “Miingon ang Biblia, nga, ‘Ang kinsa man nga magadugang og usa ka pulong ngadto Niini, o magataktak og Usa, pagataktakon ang iyang bahin gikan sa Libro sa Kinabuhi.’ Busa, ang Pulong gayud! Ang Pulong ang ginatoohan ko.”

71 Karon, ug, unya, kung giingon ni Amos, ug ang uban pang Kasulatan nagakatakdo niini, nga kung . . .

72 Ug timan-i ninyo, kini, ang mga mahinungdanong punto pa lang Niini ang ginahisgotan nato. Basta, grabe, kung . . . Pagsulod ko niadtong lawak ug—ug miabot ang Pagdihog, kung maisulat ko lang tanan kung unsay Iyang . . . kung unsa ang nangahitabo, tingali’g abton ako dinhi og tulo ka bulan sa usa ra sa Mga Selyo. Busa hisgotan ko lang ang mga bahin ug ipahayag Kini, sa paagi nga medyo dili ra kaayo matuk-an ang mga tawo. Apan, bisan pa niana, igo-igo ra nga dili sila masakitan, kondili aron nga, toohan nila, kini—timplahon kini aron maayo sa panilaw. Kabalo na mo kung unsay buut kong ipasabot.

73 Karon, matikdi n’yo kini karon, nga “Dili magbuhat ang Dios og bisan unsa,” ang ingon ni Amos, “gawas una nga Iyang ipadayag kini ngadto sa Iyang mga alagad ang mga propeta.” Ug, dayon, makita na nato kung unsay Iyang ginabuhat. Siguradong aduna gayud Siya’y butang nga pagahimoon, sa kung unsa ma’y Iyang igapadayag karon. Nagaandam na ang Dios nga manglihok sa esena, sa paghukom, nagatoo ko. Aduna gyud Siya’y butang nga pagahimoon. Ug ang usa ka butang usab, sigurado gayud nga nagapamatuod kini, nga ania na kita sa kaulahiing mga adlaw. Ania na kita sa katapusan sa kapanahonan, sa Kapanahonan sa Iglesia nga Laodicea karon, tungod nga igapadayag lamang kining mga butanga sa kaulahiing adlaw.

74 Karon, palandongang lang kana karon. Paningkamotan gyud—gyud natong ipatuhop kung unsay ginatoohan nato nga ipahibalo kanato sa Balaang Espiritu.

75 Karon timan-i, “Walay unsa man nga ipadayag; ang Dios dili magbuhat og bisan unsa, man lang, gawas una nga Iyang

ipadayag kini ngadto sa Iyang mga alagad, ang mga propeta.” Ug sa dili pa Siya magbuhat og bisan unsa, ginapadayag Niya ’una kini. Ug sa dihang ipadayag na Niya kini, mahimo ninyong timan-an kini, adunay butang nga taliabot. Kita n’yo, ginapadayag na kini.

<sup>76</sup> Ug kining mga butang nga atong ginahisgotan igapadayag ra sa kaulahiing adlaw, sa wala pa ang kaulahiing trumpeta, sa katapusan sa Mensahe sa kaulahiing kapanahonan sa iglesia. Husto kana. Kung gusto ninyong basahon kana karon, mahimo n’yong ablihan sa . . . Kamo, bag-o ko lang gisulti kaninyo, kagabii, sa makatulo ka higayon, Pinadayag 10:1-7, kita n’yo. “Ug sa mga adlaw sa pagtingog sa Mensahe sa ikapitong manulonda, ang tinago sa Dios igapadayag na ug matapos na.” Ug usa na lang ka butang ang nahibilin. Sa dihang ablihan na kining Basahon nga selyado og pito-ka-selyo, nan ang kinatibuk-ang tinago sa Dios . . .

<sup>77</sup> Aba, gisusi na nato Kini, sa daghang mga katuigan. Ug sumala sa Kasulatan, dayon, kita . . . Wala gyu’y paagi nga masabtan Kini hangtud niini nga adlaw, tungod kay natago man Kini. Nakita nato ang simbolo, nga nagsimbolo Niini, apan dili Kini mahipadayag nga ingon ka husto hangtud sa kaulahiing adlaw. Kita n’yo? Karon, kung ingon-ana, kinahanglan nga anaa kita dinha, sa—sa katapusang panahon.

<sup>78</sup> Karon, hinumdumi. Ayaw . . . Ug ayaw n’yo kalimti ha, nga, “Dili Siya magbuhat og bisan unsa gawas nga ipadayag Niya ’una kini.” Ug ayaw kalimti, usab, nga ginabuhat Niya kini sa ingon ka yanong paagi, nga, “Ang mga makinaadmanon ug mga masinabuton dili-makakita niini.” Karon, kung gusto ninyong isulat kana, kana’y Mateo 11:25-26. Ug, hinumdumi, “Dili Siya magbuhat og bisan unsa gawas nga ipadayag Niya ’una kini.” Ug ginapadayag Niya kini sa paagi nga ang mga utokan, og edukadong mga tawo dili-makakita niini. Hinumdumi, nga kaalam kadto ang gitinguha sa kalibutan imbis nga ang Pulong, sa dihang nahimo sa unang sala ang sala niini. Ayaw gyud ninyo kalimti kana. Oh, daw sa unsa kita ka angay nga mapasalamaton, nga hunahunaon kana!

<sup>79</sup> Karon tan-awa lang ang mga butang nga nagakahitabo! Tan-awa ang mga butang nga gisulti Niya kanato! Tan-awa dinhi niini nga tabernakulo, kamong mga gipadaku uban namo. Karon hangyoon ko nga ang mga teyp . . . Bueno, ipadayon rang, i-teyp kini. Apan, tan-awa, isulti ko lang kini sa mga tawo dinhi sa tabernakulo, kaninyo nga mga dugay na dinhi. Ginahagit ko ang si kinsa man kaninyo, sa Ngalan ni Ginoong Jesus, nga itudlo n’yo kung aduna ma’y usa ka butang, sa gatusan nga mga butang nga gikasulti na sa wala pa mahitabo, ug moingon nga wala kini nahitabo. Sultihi ko ninyo og usa ka higayon, nga sa entablado, dinhi, o sa kung asa man, nagsulti Siya og unsa mang butang nga dili ingon ka hingpit og ingon ka eksakto gayud.

Unsaon man? Mamahimo bang ingon niana ang hunahuna sa tawo? Siguradong dili gayud.

<sup>80</sup> Kaniadtong mitungha Siya didto sa suba, traynta’y-tres ka tuig na ang milabay sa niining taliabot nga Hunyo, sa porma nga usa ka Kahayag! Kamong mga karaan na makadumdom pa nga nagsulti ako kaninyo, sukad niadtong usa pa ako ka batan-ong lalaki, bahin nianang Tingog ug bahin niana nga Kahayag. Ug naghunahuna ang mga tawo, nga mora na kono ko og wala sa hustong pangisip. Siyempre, tingali’g hunahunaon ko usab ang mao mismong butang, kung adunay moingon niana. Apan karon dili n’yo na kinahanglang matingala mahitungod Niini karon. Ug wala na natingala ang Iglesia sukad pa niadtong 1933, didto sa suba niadtong adlaw, kon diin nagpangbautismo ako didto og gatusan ka mga tawo!

<sup>81</sup> Madumduman ko pa nga miingon kanako kadtong lalaki nga Marra, miingon, “Ituslob mo ba kanang mga tawo, Billy?” Ang luoy’ng si Jim Marra nga taga dinhi, sa hunahuna ko siya’y patay na karon. Sa hunahuna ko nga gipatay siya didto; gipusil siya sa usa ka babaye. Apan siya—nangutana siya kanako kaniadto, “Ituslob mo ba kanang mga tawo?”

<sup>82</sup> Ingon ko, “Dili, sir. Bautismohan ko sila sa Ngalan sa atong Ginoong Jesus.”

<sup>83</sup> Ug aduna ’sab kaniadto og usa ka babaye nga miuban sa maong pundok. Giingnan niini ang usa pa ka babaye, miingon siya . . . nagpahayag, og usa ka butang mahitungod niini. Ingon siya, “Bueno, okey lang kanako nga maituslob.” Miingon, “Okey lang kana. Dili ko kana igsapayan.”

<sup>84</sup> Ingon ko, “Uli ’usa ug paghinulsol. Dili ka pa angay’ng bautismohan sa Ngalan ni Jesus Cristo.” Kita n’yo?

<sup>85</sup> Dili kini unsa man nga duladulaan lang. Kini mao ang Maayong Balita ni Cristo, nga gipadayag pinaagi og sugo, ang Pulong. Karon, mismo, kung moingon kamo, “Walay-kapuslanan ug binuang ra,” tingali’g napahimutang ninyo kana sa kung asa pa man. Apan, hinumdumi, nga gikasaad na kini diha sa Pulong nga mahitabo kini, ug eksakto gayud sa kung unsa kini. Ug ania na kini.

<sup>86</sup> Dayon, didto niadtong adlaw, sa dihang nanagtindog sila didto sa suba! Ug ang Manulonda sa Ginoo, nga gisulti ko na kaninyo nga mora’g usa—usa ka bitoon o morag ingon-ana sa halayo, dayon sa nagpaduol na Kini, ug gisulti ko na kaninyo kung unsa ang hitsura sa esmeralda nga Kahayag. Ug mitungha Kini didto, mismo sa suba kon diin ako nagpangbautismo.

<sup>87</sup> Sa dihang, ang mga negosyante dinhi sa siyudad, miingon, “Unsa ma’y pasabot niana?”

<sup>88</sup> Ang ingon ko, “Dili kana para kanako. Para kana kaninyo. Nagatoo ko. Kita n’yo? Alang kana kaninyo, nga gibuhat

kana sa Dios, aron ipahibalo kaninyo nga ang ginasulti ko kaninyo Kamatuoran.” Ingon nga usa lang ako ka bata kaniadto, batan-on pa, morag ingon-ana, ug mga baynte-uno anyos ang panuigon, sila—ayaw nilang motoo niadto, nakita n’yo, tungod kay sobra ra kadto para sa usa ka batan-on. Ug busa naghunahuna ako . . .

<sup>89</sup> Si Igsoong Roberson dinhi, nga usa sa atong mga tinugyanan, nakita ko siya kaganina lang. Giingnan ko niya niadtong miaging adlaw nga atua kono siya sa Houston kaniadtong nakudakan ang maong retrato didto, nga inyong nakita. Ug atua ako . . . Niadto nga debate, misugod na ko sa pagsulti og usa ka butang mahitungod niini, sa miaging gabii. Si Igsoong Roy mao lamang . . . uban ang usa pa ka tawo, siya lang ang tawo sa grupo didto nga adunay rekorder. Usa kadto sa karaan nga mga rekorder. Nakita ko na si Igsoong Roberson karon, ug ang iyang asawa. Busa, ug—ug kini, si Mrs. Roberson may sakit pa niadtong tungora.

<sup>90</sup> Usa ka beterano si Igsoong Roy. Ug nabuthan kaniadto ang iyang mga bitiis, ug gipahigda nila siya nga giisip nga patay na. Usa siya kaniadto ka opisyal sa—sa Kasundalohan. Ug naigo sa usa ka German 88 kadtong tangke nga iyang gisakyan, ug halos napatay gyud siya niadto, ug halos nagpabungkag kaniya. Gipahigda nila siya, giisip nga patay na, sa hataas nga oras. Ug ang ingon nila nga dili na siya makalakaw, tungod nga nagrabeahan gyud ang iyang duha ka bitiis, ang mga ugat niini, ug mga ingon-ana. Aba, halos maapsan pa gani ko niya karon sa paglakaw.

<sup>91</sup> Apan unsa man kini? May sa kung unsang butang nga iyang nakita, ug miadto siya sa Houston. Ug ginaingnan ko niya mahitungod sa iyang asawa. Ug dala niya ang—dala niya ang maong rekorder; iplatar niya kana sa usa ka teyp. Ug pagkahuman sa mga panerbisyo dinhi, bueno, ipatukar na niya kana para kaninyong tanan, nagalaum ko. Ug pinaagi sa karaan na nga rekorder didto, narekord niya ang akong mga panerbisyo nga gipahigayon didto sa Houston. Ug dayon ang iyang asawa, ingon siya, napaminawan niya kini dinha, ug wala gyud kono niya namatikdan kana hangtud niadtong miaging adlaw.

<sup>92</sup> Ang iyang asawa, oh, naguol kaayo siya kaniadto. Nagmasakiton siya, ug gusto gyud niini nga makaapil sa linya sa pagpaampo. Wala pa sila makaila kanako, ug wala ko pa pud sila nakita sa tibuok kong kinabuhi kaniadto. Busa nagalingkod ra siya sa may—may bintana niadtong adlaw, nga nagatan-aw sa gawas, ug nagmasulob-on kaayo, kabalo mo, ug naguol gayud, ug nangandoy nga makakuha unta siya og prayer kard, aron makaapil sa linya.

<sup>93</sup> Ug, nahitabo nga, niadtong gabhiona nakaapil ra gyud siya sa linya, o sa misunod nga gabii, o morag ingon-ana. Nagatoo ko,

nga sa mao ra nga gabii. Ug nakaapil siya sa linya. Ug sa pagsaka na niya sa entablado, gisultihan siya sa Balaang Espiritu, og miingon, “Karon, dili ka taga dinhi. Gikan ka pa sa usa ka siyudad nga gitawag og New Albany.” Ug ingon pa, “Karong adlaw nagalingkod ka sa may bintana, nga nagatan-aw sa gawas, ug nabalaka gayud mahitungod sa pagkuha og prayer kard.” Nakarekord kana, sa teyp, mga tuig na ang milabay.

<sup>94</sup> Ug dayon sa pagsugod sa panagtigum, sa dihang atua ang Balaang Espiritu. . . Pagsugod pa lang kadto sa maong mga panagtigum. Aduna pa lang 'mi kaniadto og tulo ka libo ka mga tawo, dayon miabot og walo ka libo, dayon hangtud na sa halos traynta ka libo. Busa pagkahuman sa. . . Samtang nagwali ko didto sa. . . Usa sa pinaka una nga mga panagtigum, miingon ko, “Wala ko kahibalo kon nganong ginasulti ko kini.” Karon, nakarekord kini sa teyp. “Apan, kini, kita'y. . . Mamahimo kining usa sa mahinungdanong mga panghitabo sa akong panahon. Adunay butang nga mahitabo atol niini nga panagtigum, nga mahimong mas halangdon pa kay sa nakita na ni kinsa man.”

<sup>95</sup> Ug kadto'y mga walo pa lang o siyam, napulo ka gabii human niadto, sa dihang nagpakita ang Manulonda sa Ginoo sa atubangan sa halos traynta ka libo ka mga tawo, ug minaug, ug nakudakan ang maong hulagway. Anaa Kini, karon mismo, nga gihatagan na og copyright didto sa Washington, DC, ingon nga mao'y bugtong supernatural nga Persona nga nakuhaan og retrato sukad-sukad sa kalibutan.

<sup>96</sup> Dayon naghigot ako mahitungod sa, kabalo na mo, moingon ako usahay, ilalun sa pagpang-ila, moingon, “Usa ka tawo nalandongan og kamatayon. Natabonan og itum nga tabon, sa usa ka landong. Himalatyon na kini.”

<sup>97</sup> Ug dayon didto sa East Pines, o Southern Pines, nagatoo ko nga didto kini, sa dihang atua ako didto sa ulahi nga panagtigum. Usa ka gamay'ng gining ang nagalingkod didto, ug may Butang nga misulti kaniya, “Kuhai kana og retrato, sa gilayon,” sa dihang nagpakig-istorya ako sa usa ka babaye. Ug mao kadto. Siguro ibutang nila kini diha sa paskinan; o gibutang na, nga taud-taud na. Atua kining itum nga tabon nga nagatabon mismo sa ulo sa maong babaye.

<sup>98</sup> Gi-retratohan niya kadto og utro, pagkahuman nga miingon ang Balaang Espiritu. Nawala Kadto. Pagkaingon nga, “Mamaayo ka na. Giayo ka na sa Ginoo. Wala na ang maong kanser.” Ug mao na kadto. Ug naayo ang maong babaye. Kita n'yo? Tan-awa. Kita n'yo?

<sup>99</sup> Nagapakita lang kini nga nasayod ang Dios kung unsa na ang oras sa adlaw. Wala gyud kita nasayod. Kinahanglan lang natong mosunod Kaniya.



100 Karon puede ra man nga magpadayon kita sa pagsulti, apan hisgotan na nato karon, sa makadiyut na lang, ug balikan kining Selyo, aron maitakdo nato kining usa diha Niini. Karon, balikan 'sa nato, sa maka- . . . sa makadiyut, ang—ang usa pa, ang Unang Selyo.

101 Namatikdan nato, diha sa pag-abli sa Unang Selyo, nga si Satanas adunay usa—usa ka super ka, relihiyoso nga tawo. Namatikdan ba ninyo kanang mangangabayo sa puti-nga-kabayo? Nga, ilang, gidahum kini nga mao kanang. . . ang nahaunang Iglesia nga mitungha; apan, oh, grabe, gikatudlo na kana sulod sa daghang mga katuigan, apan dili kana mahimong ingon niana. Matikdi ninyo ang uban pa niini, pag masumpay-sumpay na nato kining tanan, dayon tan-awa n'yo kung asa na kini, kita n'yo. Karon, ug wala ko kahibalo kung unsa ba ang uban pa niini, wala pa ko mahibalo. Apan nasayod ko nga moabot gyud kini sa ingon ka hingpit dinha, tungod kay kini mao man ang Kamatuoran. Ang Kamatuoran kini. Kadto mao ang herarkiya sa iglesia sa Roma, eksakto gayud.

102 Kining mga tawo nga nagahunahuna nga ang mga Judeo kono mao ang anticristo, sila'y minilyon ka milya nga halayo ra. Ayaw gyud ninyo hunahunaa nga ang mga Judeo mao ang anticristo. Gibutahan lang ang ilang mga mata, sa tuyo, aron aduna kita'y paagi nga makasulod, og ginahatagan kita og kahigayonan nga maghinulsol.

103 Apan ang anticristo Gentil. Sigurado gayud. Usa kini ka manunundog sa Kamatuoran; *anti*, “batok.” Karon, kining bantugang super-nga-tawo, oh, daw sa unsa nga nahimo siyang usa ka bantugan nga tawo, ug—ug dayon sa katapusan gipalingkod na sa trono. Ug dayon, human nga gipalingkod sa trono, gipurongpurongan siya. Ug karon, siya, pagkahuman niana, gisimba na siya imbis nga ang Dios unta.

104 Karon, tan-awa, niadtong wala pa kana mahitabo. Aduna ko'y gustong ipangutana kaninyo. Kinsa ba kana? Unsa man Kanang atua kang Pablo, diha sa Ikaduhang Mga Taga-Tesalonica 2:3, nga miingon nga moabot kana nga tawo? Nganong sa pagtan-aw nianang tawhana sa tanang kapanahonan ug nakita niya kana? Siya'y propeta man sa Dios. Sa walay duhaduha. Nganong. . .

105 Ang ingon niya, “Ang Espiritu sa tin-aw nagapahayag, nga sa kaulahiing mga panahon sila managpamiya gikan sa pagtoo, ug magapatalinghug sa malimbongon. . .” Kabalo na mo kung unsa ang *malimbongon*. Usa ka malimbongon nga espiritu sa iglesia, kana mao ang mga ministro. “Malimbongon, nga espiritu sa mga ministro, mga buhat nga iya sa mga yawa; mga pagpakaaron-ingnon sulod sa iglesia.”

106 “Mga gahi'g-ulo, hambugiro,” may kaalam, nakita n'yo, utokan, maalamon; “adunay dagway sa pagkadiosnon.”

(Moadto, og moingon, “Bueno, mga Cristohanon kami; kinahanglan magsimba kami.”) “Adunay dagway sa pagkadiosnon, apan ginapanghimakak ang mga kapadayagan, ang Gahum ug ang buhat sa Espiritu; likayi kining maong mga tawhana.” Kita n’yo? Karon matikdi, miingon siya, “Kay mao kini ang matang nga magapanaka-saka sa kabalayan, ug magapamihag sa mga mahuyang nga babaye. . .” Dili kana nagapasabot nga mga kababayan-an nga adunay Espiritu Santo. “Mga mahuyang nga babaye nga ginadaldal sa nagkalainlaing mga pangibog.”

107 Nagkalainlaing mga pangibog! Gusto lang nila makasulod sa matag gamay’ng butang nga mahimo nilang sudlan, ug sa tanan nang matang sa mga kapunongan; ug magkinabuhi ra sa bisan unsang paagi nga gusto nila, ug, sa gihapon, “Nagasimba man kami. Mga buutan man kami sama ni kinsa man.” Manambong og mga sayawan, mga pagparty-party, ginapaputlan ang mga buhok, nagapangmeyk-ap, nagabisti og bisan unsa nga gusto nila; og sa gihapon, “Kami’y—mga Pentecostal man kami. Kami’y—mga maayo man kami sama ni kinsa man.” Oh! Ang inyo mismong mga buhat ang nagapaila kaninyo. Tinuod. Matikdi.

108 Apan miingon siya, “Mga tawong dunot ang pagpanghunahuna, mahitungod sa Kamatuoran.” Unsa man ang Kamatuoran? Ang Pulong, nga mao si Cristo. “Mahitungod sa Kamatuoran.”

109 “Oh, ginahimo mong. . . Ikaw, usa man gud ka ka tig-domina sa mga kababayan-an. Madulomtanon man gud ka sa mga babaye. Ginahimo mo ang *ingon-niini*, *ingon-niana*.”

110 Dili, sir. Dili kana husto. Usa—usa kana ka bakak. Wala ko’y kasuko sa mga babaye. Wala, sir. Sila’y mga igsoon kong babaye, kung sila ma’y mga kaissoonang babaye. Apan ang butang nga akong. . .

111 Matul-iron ang gugma. Kung dili kini matul-iron, nan dili kini gugma. Kung kini mao man, nan, kung ingon-ana, kung gugma kini, kini’y—kini mao’y gugmang phileo ug dili nga agapao, sultihan ko kamo niana. Tingali aduna sila’y diyutay’ng gugmang phileo alang sa kung kinsa nga guwapang babaye. Apan lahi ang gugmang agapao, kana mao’y gugma nga nagapanul-id og butang, ug ginatagbo ang Dios sa kung asa man aron mahimo kitang magkinabuhi sa Walay-Katapusan. Kita n’yo? Wala ko gituyo nga ingon niana, siguro, morag ingon niana lang kung paminawon, apan ako. . . Kabalo mo kung unsay akong—akong. . . Nagalaum ko nga nasabtan ninyo. Bueno.

112 Karon, apan, timan-i, nga miingon si Pablo, “Maingon nga si Janes ug si Jambres misupak kang Moises, mao usab ang ilang pagabuhaton. Apan ang ilang kabuang madayag ra sa dili madugay.”

113 Ngano man? Sa kaniadtong gisugo si Moises sa pagbuhat og usa ka butang nga daw hilabihan ra kaayo, apan, miadto gyud siya nga ingon ka matinuuron kutob sa iyang mahimo. Ug giingnan siya sa Dios nga kuhaon kadto, kadtong sungkod, ug ibalibag kadto, ug mamahimo kadto nga bitin. Dayon, gibuhat kadto sa Dios, aron ipakita kaniya kung unsa gyu'y mahitabo. Ug sa atubangan ni Faraon, mibarug siya didto ingon nga gisugo siya sa Dios, ug gibalibag niya ang iyang sungkod, ug nahimo kadtong usa ka bitin.

114 Ug walay duhaduha, nga miingon si Faraon, "Usa ra man kana ka baru nga lingla sa salamangkero!" Busa nagsugo siya ug gipakuha ang iyang Janes ug Jambres. Miingon, "Mahimo man namo kanang mga butanga, usab." Ug gibalibag nila ang ilang sungkod, ug nahimo 'sab kadtong mga bitin.

Karon unsa ma'y gibuhat ni Moises?

115 Unsa man kadto? Usa kadto ka pagpakita nga, sa matag matuod nga butang sa Dios, aduna pud ang yawa og usa ka manunundog niini. Sundog-sundogon nila, aron ipasimang ang mga tawo.

116 Unsa ma'y gibuhat ni Moises, miingon ba, "Bueno, siguro nasayup ako. Mas maayo pang mobalik na lang ko"? Nagpabilin lang siya sa gihapon, tungod kay nabuhat man niya ang gikasugo kaniya, sa ingon gayud ka eksakto.

117 Dayon, mahibaloan mo na lang, nga gilamoy ra sa bitin ni Moises ang laing bitin. Kita n'yo? Nahunahunaan n'yo ba kung unsa kaha'y nahitabo sa maong laing bitin? Asa kaha kadto mipaingon? Gipudyot ni Moises ang maong sungkod ug mibiya na nga dala-dala ra kadto. Namuhat siya og mga milagro pinaagi niadto. Ug kadtong bitin atua ra sa sulod niadtong sungkod. Kita n'yo? Kahibulongan kana. Dili ba? Oo, sir.

118 Karon, hinay-hinay na, nga nagakahayag ang anticristo. Gusto kong himatikdan ninyo kini. Karon, pagmadungog ninyo . . .

119 Karon, sa mga higala kong Katoliko, pagpabilin lang 'sa mong nakalingkod sa makadiyut lang, ug karon; ug dayon atong hibaloan kung asa ba ang mga Protestante; kung asa na kitang tanan, kita n'yo.

120 Himatikdi, ang unang iglesia, pagmoingon ang iglesiang Katoliko nga sila mao ang una, ang orihinal nga iglesia, husto gayud sila. Sila man gyud. Misugod sila kaniadto sa Pentecostes. Dinha kon diin nagsugod ang iglesiang Katoliko. Bueno, dili gyud ko halos motoo niana kaniadto, hangtud nga nabasa ko ang kasaysayan, ug nahibaloan kong husto diay kini. Misugod sila didto sa Pentecostes. Apan hinay-hinay silang mitipas palayo, ug makita man ninyo kung asa na sila karon.

<sup>121</sup> Ug kung nagatipas ang Pentecostal nga ingon ka paspas sa pagtipas niini karon, nan dili na kinahanglan niini nga modangat pa og duha ka libo ka tuig. Usa ka gatus ka tuig gikan karon, sila’y mahimong mas halayo pa kay sa iglesiang Katoliko. Husto kana.

<sup>122</sup> Apan matikdi, kung unsa, kining mangangabayo sa puti-nga-kabayo. Karon hatagan lang nato kini og paghulagway, diyutay, hangtud nga mahisgotan na nato kini nga Selyo. Karon matikdi n’yo ang mangangabayo sa puti-nga-kabayo, sa diha nga migawas siya, siya—namuhat siya sa tulo ka hugna. Ang yawa, maingon nga gipamatud-an ko na kaninyo sa miaging gabii, anaa kini diha sa trinidad, sama ra sa Dios. Apan ang mao ra sa gihapon kini nga yawa sa tanang panahon, diha sa tulo ka hugna. Matikdi ang iyang mga hugna. Sa unang hugna, misulod siya. . .

<sup>123</sup> Mikunsad kaniadto ang Espiritu Santo, ug ginapanag-usahan sa pag-ambit sa mga tawo ang tanang butang. Ug anaa ang Espiritu sa Dios kanila. Ug nangadto ang mga apostoles sa mga kabalayan, nagpikas-pikas og tinapay uban sa mga tawo. Ug adunay dagkung mga ilhanan ug mga katingalahan ang nangahimo.

<sup>124</sup> Ug—ug dayon, mahibaloan mo na lang, misugod na si Satanas magpatungha og mga pagbagulbol.

<sup>125</sup> Dayon, wala magdugay, kining mga ulipon ug mga kabus sa yuta, kadtong mga nakadawat sa Espiritu Santo, nanagsangyaw sila sa nagkalainlaing mga dapit, og nanagpamatuod. Nanagpamatuod sila bisan sa ilang mga agalon.

<sup>126</sup> Ug wala pud magdugay, misugod nga mitambong, oh, ang mga kapitan sa kasundalohan ug—ug ang nagkalainlaing mga tawo. Hinay-hinay ’sab nga nakita sa bantugang mga tawo ang pagkamaisogon, ug ang mga milagro ug mga ilhanan nga gipangbuhat niining mga magtotoo, mao nga gidawat nila ang Cristianismo.

<sup>127</sup> Bueno, pagkahuman niadto, nakita n’yo, sa dihang gidawat niya ang Cristianismo, ug nagatambong na didto sa usa ka dapit kon diin sila nagakatigum, sa usa ka gamay’ng karaan og mangitngit, mahugaw’ng tigumanan; ug ginapalakpak ang ilang mga kamot, ug nanagsinggit, ug nanagsulti sa laing mga dila, ug nagapatalinghug og mga mensahe. Aba, dili gyud niya mahimong dalhon kana ngadto sa iyang—iyang kakumpitensiya, o unsa man, sa iyang negosyo. “Dili gyud Kini mahimong toohan sa akong mga kauban, nga sama niana.” Siguradong dili gyud. Busa, kinahanglan niyang dayandayanan Kini. Mao nga misugod silang nagkahiusa, ug nagsugod nga maghunahuna, “Karon magtukod kita og usa ka butang nga medyo lahi.”

<sup>128</sup> Ug si Jesus, dihadiha mismo, sa unang kapanahonan sa iglesia, giingnan Niya sila. Sa ika-2 nga kapitulo dinhi sa

Pinadayag, “Ako adunay batok kanimo, tungod niining mga buhat sa mga Nicolaita.”

<sup>129</sup> *Nikao*, “pagpangdaug” sa mga ordinaryong tawo sa iglesia. Sa laing pagkasulti, gusto nilang maghimo, imbis unta nga himoong parepareho ang tanan, gusto nilang maghimo og usa ka balaan nga tawo. Gusto nilang maghimo og usa ka matang sa . . . Gusto nilang ipareho kini sa paganismo, kon diin sila gikan, ug sa katapusan gibuhath gyud nila kini.

<sup>130</sup> Karon matikdi. Una, “Nicolaita.” Ang *Nicolaita* gitawag, diha sa Biblia og, “anticristo,” tungod kay batok man kana sa orihinal nga Doktrina ni Cristo ug sa mga apostoles.

<sup>131</sup> Dili ko gustong isulti ang ngalan sa niini nga tawo. Usa siya ka ilado nga tawo. Apan nakatambong ako sa iyang panagtigum, dinhi pipila na ka tuig ang milabay. Ug kahibalo siya nga atua ako didto, tungod kay gilamano ko man siya. Ug ingon siya, “Oh, kabalo mo, aduna kita’y ingon-niana sa karon nga ginatawag nilang mga Pentecostal.” Ug miingon siya, “Sila, nakadepende ra sila sa Basahon sa Mga Buhat.” Ug ingon pa siya, “Nakita n’yo, ang Mga Buhat pang-tigbayong buhat lang man sa Iglesia.”

<sup>132</sup> Mahunahuna ba ninyo, ang usa ka tawo nga nagtuon sa Biblia, usa ka maisogon nga tigulang lalaki, ug nagtuon sa Biblia sa samang paagi nga pagtuon niya, ug unya magpahayag og sama niana? Daw mora kini, dili kini . . . Kini—kini mora gayud og dili iya sa Balaang Espiritu. Bueno, dili gayud kini mamahimong ingon-ana, sa bisan asa pa tan-awon.

<sup>133</sup> Tungod kay, ang si kinsa man nga adunay yanong panabot nasayod gyud nga ang Mga Buhat sa mga Apostoles dili mao’y mga buhat sa mga apostoles. Mga buhat kadto sa Balaang Espiritu diha sa mga apostoles. Wala ba mo mahibalo kung giunsa nato pagpatakdo niini sa mga kapanahonan sa iglesia? Kadtong mga buhing-binuhath nga atua didto, nga nagabantay niadtong Arka. Si Mateo, si Marcos, si Lucas, ug si Juan, nagabarug ’sab dinha, nga nagabantay Niana. Ug mao Kana ang nahitabo, ingon nga mga resulta sa sinulat ni Mateo, ni Marcos, ug ni Juan.

<sup>134</sup> Mao kana’y gisalingsing sa punoan . . . ang unang sanga niini, ug mao kana’y nahitabo. Ug kung kanang punoan manalingsing og usa na usab ka sanga, nan magasulat sila og usa na usab ka basahon sa mga buhat human niini. Tungod kay, nakita n’yo, ang mao ra nga Kinabuhi ang kinahanglan maanaa sa mao gihapon nga butang.

<sup>135</sup> Busa karon, niining panahona, pag tan-awon nato ang atong denominasyonhong mga iglesia, ang Methodist, Baptist, Presbyterian, Lutheran, Iglesia ni Cristo (kono), ug mga Pentecostal ug mga ingon-ana, asa man nato makaplagan kana? Dili n’yo kana mahikaplagan.

136 Moangkon ako nga ang mga Pentecostal ang may pinakaduol nga butang Niini, sa mga kaiglesiahan, tungod kay ania man sila mismo sa Kapanahonan sa Iglesia sa Laodicea. Naangkon na unta nila ang Kamatuoran ug gisalikway pa Kini. Nahimo silang dagaang Niini, ug gisuka sila sa Dios gikan sa Iyang baba. Eksaktong sumala kana sa mga Kasulatan.

137 Dili mo mahimong mapabakak ang mga Kasulatan. Kita n'yo? Ang mga niini matinud-anon gayud, sa kanunay. Ayaw n'yo sulaying... Ang bugtong butang, ayaw n'yo sulaying ipayon ang inyong panghunahuna ngadto sa... o ipayon ang mga Kasulatan ngadto sa inyong panghunahuna. Kondili ipa-... ipayon n'yo ang inyong kaugalingon sa mga Kasulatan. Kana'y, kung ingon-ana nagadagan kamo kauban ang Dios. Bisan unsa pa nimo ka kinahanglang mopahilayo, o magpadaplin, mosubay gyud ka Niana. Kita n'yo?

138 Tan-awa n'yo kung unsay gibuhad Niini sa unang higayon nga mikunsad Kini. Bueno, kung nanglihok ang Dios nga ingon-niana sa unang higayon, nan kinahanglan Niyang manglihok nga ingon-niana sa ikaduhang higayon. Kinahanglan Niyang manglihok nga sama niana sa matag higayon, kay kon dili nasayup diay Siya sa unang higayon.

Kita n'yo, kita ingon nga mga mortal, nagakasayup kita. Apan ang Dios dili gayud.

139 Ang unang desisyon pa lang sa Dios hingpit na. Ug ang paagi nga Iyang gipili sa pagbuhad og mga butang, wala na'y uban pang, mas maayo nga paagi. Dili na Niya puedeng palamboon pa kini, tungod kay hingpit na kini, sa sugod pa lang. Kung dili kini hingpit, nan dili diay Siya mao ang walay-kinutoban. Ug kung Siya walay-kinutoban, kung ingon-ana Siya'y nahibalo-sa-tanan. Ug kung Siya'y nahibalo-sa-tanan, nan Siya'y makagagahum-sa-tanan usab. Amen! Kinahanglan Niyang mahimong ingon-niana, aron mahimong Dios. Kita n'yo? Busa kamo—dili kamo puedeng moingon, karon, “Nadugangan pa ang Iyang kahibalo.” Wala na nadugangan pa ang Iyang kahibalo, Siya mao'y—Siya mao ang mismong tinubdan sa tanang kaalam. Kita n'yo?

140 Ang atong kaalam dinhi nagagikan kang Satanas. Gipanunod nato kini gikan sa Eden, kon diin atong gibaylo ang pagtoo para sa kaalam. Gibuhad kini ni Eva kaniadto.

141 Karon, gitawag si Satanas una nga anticristo. Sa ikaduhang hugna, gitawag siyang mini nga propeta, tungod kay nagpakatawo man kana nga espiritu taliwala sa mga tawo.

142 Hinumdumi ninyo, ang mangangabayo sa puti-nga-kabayo wala siya'y korona sa iyang pagsugod, apan pagkahuman siya'y... gihatagan ra og usa ka korona. Ngano man? Siya man mao ang espiritu ng Nicolaita, sa sugod pa lang; ug dayon nagpakatawo siya sulod sa usa ka tawo; ug pagkahuman

gipurongpurongan na siya, ug nakadawat og usa ka trono ug gipurongpurongan. Ug dayon gibuhat niya kana sa dugay nga panahon, nga makita nato samtang atong. . . ang Mga Selyo ginatangtang na.

<sup>143</sup> Ug dayon nahibaloan nato, nga human nianang dugay nga panahon, gipalagpot si Satanas gikan sa Langit. Ug mikanaug siya, sumala sa Kasulatan, ug gipalingkod sa trono ang iyang kaugalingon. Hunahunaa lang ninyo, gipalingkod niya sa trono ang iyang kaugalingon pinaagi niana nga tawo, ug nahimong usa ka mapintas nga mananap. Ug aduna siya’y gahum, labing-hataas nga gahum, nga sama nianang iyang nabuhat, ang tanang mga milagro ug tanan-tanan na, nga—nga, o ang mga pagpamatay ug ang madugo nga mga pagpakig-away ug tanan na nga—nga mahimo sa Roma. Bueno. Nagpamatay siya pinaagi niadtong mabangis, nga Romanhong silot. Daw sa, oh, makaabli gyud kita og pipila ka mga Kasulatan dinhi!

<sup>144</sup> Hinumdumi, nga namatay si Jesus Cristo ilalum sa silot sa Roma, sa silot nga kamatayon.

<sup>145</sup> Ang Mensahe nga aduna ako sa akong kasingkasing, aron iwali dinhi sa niining mosunod nga panagtigum, sa Biyernes Santo sa hapon, og itakdo ang tulo, upat ka butang, kita n’yo. “Didto gilansang nila Siya.” “*Didto*,” ang pinakabalaan, pinakarelihiyoso nga dapit sa kalibutan nga mao ang Jerusalem. “*Sila*,” ang pinaka balaan (unta) nga mga tawo sa kalibutan, ang mga Judeo. “Didto ilang *gilansang*,” nga mao’y pinaka mabangis nga silot nga mahimo sa Roma. “Gilansang *Siya*.” Ang unsa man? Ang pinakahalangdon nga Tawo nga nabuhi sukad-sukad. “Didto gilansang nila Siya.” Oh, grabe!

<sup>146</sup> Tabangan unta ko sa Dios nga mapatuhop Kini ngadto sa pundok sa mga negosyante, hangtud nga ilang makita kung asa sila nagabarug. Bueno. Karon, dili aron nga mahimong lahi, dili aron nga mahimong dautan; kondili aron iwara-wara Kana, hangtud nga makita nianang mga igsoon nga ang ilang mga talahuron ug balaan nga mga amahan, ug ang mga butang nga ilang ginasalat sa niining Business Men’s journal, wala diay kapuslanan. Dili man angay’ng tawgon sa mga Cristohanon ang si kinsa mang tawo nga “Amahan.” Gisugdan nila kana, og gipaningkamotan kong tabangan sila sa tanan-tanan nga mahimo ko (Makita ninyo karon kon diin nagaabot kini nga mga teyp.), busa tapos na ako, wala na gayud ko’y kahilambigitan pa niini. Bueno. Una, hinumdumi si Cristo.

<sup>147</sup> Una, sa dihang ang Nic- . . . Nicolaita, ug unsa ma’y gihangyo sa kapanahonan sa Nicolaita? Gihangyo niini nga mopahilayo gikan niadtong pundok sa mga tawo nga nagasinggit ug nagapalampak sa ilang mga kamot, ug sa mga butang nga medyo makauulaw; sama sa gibuhat nila kaniadto sa Pentecostes, nga nanaglihok nga daw sa hubog nga mga tawo, nagasarasay diha

sa Espiritu, ug mga ingon-niana. Dili nila gusto ang ingon-ana nga mga butang. Ang ingon nila nga nangahubog lang kono kadto nga mga tawo. Ug sa diha nga ang bantugang mga tawo . . . Paminaw! Ayaw n'yo sipyata kini. Tingali'g binuang man kining pamation para kaninyo, apan Kamatuoran kini. Sa diha nga hinay-hinay nang nakasulod ang—ang mga tawong hataas og katungdanan, dili na nila kadto mahimong uyonan.

<sup>148</sup> Ang nakapahimong daku sa Dios, mao'y tungod nga Siya'y daku kaayo nga mahimo Niyang magpaubos. Mao kana'y nakapahimo Kaniya nga daku. Wala na'y uban pang mas daku. Ug nagpaubos Siya ngadto sa pinakaubos nga kahimtang nga mahimo ni kinsa man, ang pinakaubos nga mahimo ni kinsa man. Siya ang Hari sa Langit, ug miadto Siya ngadto sa—ngadto sa pinakaubos nga siyudad sa yuta, ang Jerico. Ug nahimo Siyang ubos kaayo hangtud nga bisan ang pinakagamay'ng tawo sa lungsod paubos nga mitan-aw Kaniya, aron makita Siya. Husto ba kana? Si Zaqueo. Husto kana. Gitawag Siya sa pinakadautang ngalan nga mahimong itawag sa kinsa nga tawo, “usa ka salamangkero, usa ka yawa, Beelzebub.” Ingon niana ang gihunahuna Kaniya sa kalibutan. Namatay sa pinakamapintas nga kamatayon. Wala gani ni usa ka luna nga mapatongan sa Iyang ulo. Gipalagpot pa, sa tanang organisasyon.

<sup>149</sup> Apan sa diha nga gibayaw Siya sa Dios, nga hataas kaayo nga kinahanglan na Niyang motan-aw sa ubos aron makita ang Langit. Makita n'yo kung unsa, ang Dios, diha sa pagkamapainubsanon. Kita n'yo? Ug Iyang gihatagan Siya og Ngalan nga halangdon kaayo nga ang tibukok pamilya sa Langit gipangalan na Kaniya, ug ang matag pamilya usab sa—sa yuta. Ang tanang pamilya sa yuta gipangalanan og “Jesus.” Ang tanang mga pamilya sa Langit gipangalanan 'sab og “Jesus.” Ug pagkahalangdon nga Ngalan, nga, ang tanang tuhod magaluhod, ug ang tanang dila magasugid, Kaniya ingon nga Ginoo; dinhi man o sa impiyerno. Bisang impiyerno magayukbo niini. Ang tanang uban pa magayukbo niini. Kita n'yo? Apan mapainubsanon usa' kini, dayon nahimong bantugan. Kita n'yo? Tugoti nga ang Dios ang magpataas. “Siya nga ginapaubos ang iyang kaugalingon, pagapatas-on sa Dios.” Kita n'yo?

<sup>150</sup> Karon, namatikdan nato nga kining *nikao* nga espiritu nagtinguha og kaalam, nga mahimong mas-utokan. Mangatarungan man gud kini, sama kaniadto sa Eden, mangatarungan batok sa Pulong sa Dios, pinaagi og kaalam, ug nahulog ang iglesia tungod niini. Unsa man kini?

<sup>151</sup> Karon, ingnon natong, ipananglitan kining iglesia dinhi, ug ipananglitan ang usa ka pundok sa mga tawo nga sama kanato, og ipakaingon nga dili gyud ka puno-sa-Espiritu. Ug atong hisgotan, pananglitan. . . Karon, wala ako'y unsa man nga batok sa mayor sa atong siyudad. Siguro dili ko siya kaila,



si Mr. Bottorff. Siya ba gihapon ang mayor? Si Mr. . . Wala ako. . . Kita n'yo? Wala ako. . . Usa ka buutan kong higala si Mr. Bottorff, kita n'yo. Apan, ingnon natong, ang mayor sa siyudad, ug ang tibuok puwersa sa kapulisan, ug—ug ang tanang mga opisyal sa kasundalohan, ug sila—manambong silang tanan dinhi. Mahibaloan mo na lang, pag aduna sila'y gamay'ng butang sa ilang hunahuna, ug mosugod silang makig-estorya sa board ug sa mga tawo dinhi, ug moingon, “Karon kahibalo ba mo kung unsa? Lahion unta kini.” Kung dili kamo puno-sa-Espiritu, ug wala usab og usa ka tinuod nga tawong puno-sa-Espiritu sa luyo sa pulpito, mahibaloan mo na lang, nga ginauyonan n'yo na diay sila. Tingali'g dili niini nga henerasyon; tingali'g sa mosunod pa nga henerasyon.

152 Ug sa ingon-niana kini nagsugod kaniadto. Kita n'yo? Ngano man? Moingon sila, “Tan-awa n'yo dinhi. Makatarunganon man kini.” Kamo, dayon maminaw kamo.

153 Pananglitan adunay tawong mosulod dinhi, nga moingon, “Gamay ra kaayo kini nga simbahan. Magtukod kita og daku nga simbahan. Magpatukod ako og usa para kaninyo dinhi, kini'y . . . magkantidad kini og daku nga kantidad sa kuwarta, mga tunga sa milyon ka dolyares. Pagatukoron kini dinha. Ipasibya ko kini sa radyo.” Pagmosugot sila niana, nan aduna gyud sila'y mahakogon nga tinguha; nuebe sa diyes ka mga higayon, kabalo na mo, usa sa niana nga matang. Mahibaloan mo na lang, kung ingon-ana, pag-gibuhat na niya, siya na ang magpadagan sa mga butang nga mohaum sa gusto niya. “Wala kamo'y puedeng isulti og unsa man, tungod kay si Igsoong John Doe dinha sa luyo, siya na ang magdumala sa mga butang-pinansiyal niining simbahan.” Kita n'yo? Ug dayon aduna 'sab mo'y gamay'ng Ricky gikan sa usa ka seminaryo, nga halos walay nahibaloan mahitungod sa Dios sama sa usa ka Hottentot nga walay nahibal-an mahitungod sa kabalyerong Egiptohanon, ug siya na ang mag-pastor ug tagdon niya pag-ayo kana nga lalaki, tungod kay ginapalitan man siya niini og bag-ong sakyanan pirmi, ginatugotan ra siyang magbagdoy-bagdoy, ug ginapalitan pud siya og *ingon-niini, ingon-niana, ug uban pa*.

154 Karon, eksaktong ingon-ana kung giunsa niini pagsugod. Husto. Himatikdi, kaalam ug pagka-utokan! Ingon sila, “Karon tan-awa n'yo dinhi, dili ba makatarunganon lamang kini? Karon, sa . . . atong—atong mga kababayan-an, unsa ma'y kalahian niini kung patas-on man nila ilang mga buhok o dili?” Apan ginaingon sa Biblia nga aduna gyu'y kalahian. Tangtanga lang kanang usa, gikan sa gatusan nga uban pa. Kita n'yo? Aduna gyu'y kalahian. Miingon ang Dios nga mihimo kini og kalahian, busa aduna gyu'y kalahian.

155 Apan, nakita n'yo, pag nasugdan na nila kana, ug ang hunta sa mga tinugyanan, ug mga diyakono ug tanan na, mahibaloan mo na lang, ang pastor mahimong apil na niini o napalagpot

na. Ingon-ana lang. Kita n'yo, ang mga tawo man ang nagpili niini. Bueno.

<sup>156</sup> Karon matikdi, hinay-hinay nga nanglihok kana nga espiritu, ug ang iglesia nga aduna niana, nga, aduna na'y sulod niini og daghang mga tawong hataas sa katilingban, dinagkung mga butang, ug sugod nang midaghan ang kuwarta, hangtud nga wala magdugay naminaw na sila niini ug nahulog niini, sa pagkamalipoton sa yawa.

<sup>157</sup> Ug mao kana ang mismong gibuhat ni Eva kaniadto sa tanaman sa Eden. Karon, nadungog ninyo kana. Husto kana. Tan-awa, ang natural nga babaye, ang pangasaw-onon ni Adan, sa wala pa niya giduol si Eva ingon nga iyang asawa, nahulog na kini sa pagpanglimbong ni Satanas batok sa Pulong sa Dios, pinaagi sa pagpangatarungan Niini. Sa wala pa nakig-ipon si Adan kang Eva ingon nga iyang asawa, giunahan na siya ni Satanas. Husto kana. Nadungog n'yo na *Ang Punoang Pangasaw-onon*, nga ako nang giwali. Naghisgot kana mahitungod niini, kita n'yo. Bueno. Karon matikdi, dinha, nahulog si Eva tungod sa pagpangatarungan. Karon siya, si Satanas, misulay nga mangatarungan Niini.

Miingon ang babaye, "Apan miingon ang Ginoo . . ."

<sup>158</sup> Ingon ni Satanas, "Oh, kabalo ka, siguradong dili gyud kana buhaton sa Ginoo. Kita mo? Ikaw, gusto mo man kahang mahimong maalamon. Gusto mong aduna'y mahibaloan. Aba, wala ka'y kapuslanan kondili usa ka burong nga batan-ong babaye. Kita mo? Kinahanglan aduna gyud ka'y mahibaloan." Dili ba ingon niana gyud si Satanas! Oh, grabe!

<sup>159</sup> Dili ba ingon niana man usab ang pipila niining mga, moderno, kita n'yo, "Oh, usa ra man na sila ka pundok sa mga holy-roller. Ayaw n'yo sila hatagi'g pagtagad, nakita n'yo. Ayaw pag-adto . . . Kita n'yo?"

<sup>160</sup> Karon, ang natural, ang unang pangasaw-onon sa tawo, sa wala pa miipon kaniya ang iyang bana, nahulog na siya gikan sa grasya, tungod sa pagpaminaw sa bakak ni Satanas, human nga gipanalipdan siya sa Dios luyo sa Iyang Pulong. Kung nagpabilin lang siya luyo sa Pulong, wala gyud unta siya nahulog. Karon mao kana ang sa natural, matikdi, ang natural nga babaye.

<sup>161</sup> Ug unsa kaniadto ang tunglo, ang tinuod nga tunglo tungod sa paggawas gikan sa pagpanalipod sa Pulong sa Dios?

<sup>162</sup> Karon hinumdumi, nga gitooan niya ang halos nubenta'y-otso porsyento Niini. Apan usa ra man ka Butang ang kinahanglan mong sipyat. Kita n'yo? Gitooan niya ang halos kinatibuk-an Niini. Oh, sigurado gayud. Gisulti niya ang Ingon-niini, ug moangkon pud si Satanas nga husto Kadto. Kung madala ka lang niya sa usa ka suok, mao lang kana ang gitinguha niya. Kita n'yo? Ang butang lang nga imong buhaton mao'y ipatipas lang ang bala og diyutay *paingon-niining* direksyon,

ug dili na niini maigo ang maong puntirya. Kita n'yo? Kana lang. Karon, gitooohan ni Eva ang halos kinatibuk-an Niini, apan nasipyat siya sa gihapon.

<sup>163</sup> Karon, ug ang—ug ang mga resulta, tungod kay gibiyaan man niya ang Pulong, tungod sa diyutay'ng tipik lang sa pagpangatarungan.

<sup>164</sup> Bueno, moingon mo karon, “Unsa man diay ang mahitungod sa mga kababayan-an?” O, “Nganong gusto mo man gud hisgotan ang mahitungod sa ingon-anang butang?” Apan bisan unsa man nianang gagmay'ng mga butang. “Unsa ma'y kalahian, kung kini ba'y unang kapanghimatuoran?” May sa kung unsang butang niini! Kinahanglan mong . . .

<sup>165</sup> Kinahanglan nga maiklaro kini. Namasin ra kita Niini, sulod sa pito ka mga kapanahonan sa iglesia, halos. Apan miabot na ang takna nga ginasulti na Kini sa Dios. Ug dili lamang Niya ginasulti Kini, kondili ginapakita Niya usab Kini, ug ginapanghimatud-an Kini, ug ginapamatud-an Kini. Husto kana. Kung wala Niya gibuhat kini, nan dili kini iya sa Dios, kana lang. Ginapaluyohan sa Dios ang Iyang Pulong.

<sup>166</sup> Himatikdi karon. Karon, ang natural nga babaye ang nagpahinungdan sa natural nga kamatayon, tungod kay naminaw man siya sa pagpangatarungan, aron himoong maalamon ang iyang kaugalingon, himoong maalamon ang iyang kaugalingon imbis nga magpabilin lang unta luyo sa Pulong ug buhaton kung unsay gisulti sa Dios kaniya nga pagabuhaton. Gitinguha niya ang kaalam, ug aron mahimong maalamon. Ug naminaw siya sa pangatarungan, ug—ug gipahisalaag niya ang tibuok kaliwatan sa tawo. Kita n'yo?

<sup>167</sup> Karon, niining panahona, ang espirituwal nga babaye, ang Pangasaw-onon ni Cristo nga nagsugod kaniadto sa Adlaw sa Pentecostes, uban ang nahaunang apostolikanhong Iglesia, giwala pud ang mao gihapong butang didto sa Konseho sa Nicaea. Lee, kabalo ka nga husto kana. Ug didto—didto sa Konseho sa Nicaea, sa dihang gibaylo niya ang iyang mga espirituwal nga pagkapanganay, aron dawaton ang dagkung mga simbahan ni Constantine ug ang mga butang nga gitanyag niini kanila kaniadto, ug didto niya gibaligya ang iyang pang-Kasulatan nga mga pagkapanganay alang sa usa lang ka hugpong sa Romanhong dogma. Karon, masakit kana para sa Katoliko. Apan gibuhat man usab sa Protestante ang mao gihapong butang, ug girepresentar, dinhi sa Biblia, ingon nga usa ka anak nga babaye, “sa bigaon, sa mismong bigaon.” Husto gayud kana, ang matag usa kanila! Wala na'y mga pagpasumangil.

<sup>168</sup> Apan gikan dinha sa kanunay aduna gyu'y diyutay'ng mga nahibilin, sukad pa kaniadto, nga mao'y magalangkob sa Pangasaw-onon.

169 Matikdi, nawala na kaniya ang iyang mga pagkapanganay, kita n'yo, sa wala pa miipon kaniya ang iyang bana. Kita n'yo? Sa wala pa ang kasal, nawala na kaniya ang iyang kaputli.

170 Ug karon mahinumduman ninyo dinha, nga miingon siya, “Nagalingkod ako ingon nga usa ka rayna. Walay nakulang kanako,” sa nianang Kapanahonan sa Laodicea. “Datu ako ug nagmauswagon, ug uban pa. Ug, oh, ang tibuok kalibutan nagasud-ong kanako. Ako ang bantugan, balaan nga iglesia, ug uban pa. Kami’y *ingon-niini*,” ang tibuok kapanahonan.

171 Ug miingon ang Dios, “Wala ka mahibalo nga ikaw hubo, buta, makaluluoy, alaut, kabus, ug wala mahibalo niini.” Mao kana ang kahintang. Karon, kung miingon ang Balaang Espiritu nga mamahimong ingon-niana ang kahintang sa kaulahiing mga adlaw, mamaingon-niana gayud kana! Wala na’y paagi nga makalikay pa niini. Ingon niana gayud kini.

172 Karon matikdi. Karon, sa dihang gibaligya niya ang iyang mga pagkapanganay kaniadto, ang iyang putli nga katungod, sa Pulong, unsa ma’y gibuhat niya? Sa dihang gibuhat kadto ni Eva, giwala niya ang kabuhatan; ang tibuok kabuhatan nahulog sa ilalum niya.

173 Karon matikdi, ug sa diha nga gibuhat pud kini sa iglesia, nga midawat og mga dogma imbis unta nga ang Espiritu ug ang Pulong, gitunglo niini ang tibuok sistema. Ang matag sistemang pang-denominasyon nga aduna na kaniadto, o magkaaduna pa, gitunglo na uban niini, ug nahulog, tungod kay wala na ma’y uban pang paagi.

174 Pag magpatigum mo og usa ka pundok sa mga kalalaken-an, aron paninguhaong sabton ang unsa mang butang, ang usa adunay ideya nga *ingon-niini*, ug ang usa aduna pu’y ideya nga *ingon-niana*, ug ang usa na usab adunay ideya nga *ingon-niini*. Ug tigumon nila ang maong mga ideya ug isagol-sagol kini, ug, ang resulta niini, mao kana ang nagpasimang sa iglesia.

175 Eksaktong ingon niana ang gibuhat nila kaniadto sa Konseho sa Nicaea. Eksaktong ingon niana ang gibuhat nila sa Methodist, Presbyterian, Church of Christ, ug sa uban pa kanila. Ug walay tawo, bisan unsa pa’y ipadayag sa Dios kaniya, kinahanglan n’yong itudlo kini sumala sa ilang kredensiyal, sumala sa gisulti sa ilang kredo—kredo, kay kon dili palagpoton nila kamo pagawas. Karon, ayaw na ko sultihi pa. Nasinati ko na kana, kita n’yo, ug nasayod gyud ko niana.

176 Ug eksaktong ingon niana gayud ang nahitabo, mao nga gitunglo ang maong tibuok butang. Dili ikatingala nga miingon ang manulonda, “Gumula kamo gikan kaniya, mga tawo Ko, aron dili kamo makaambit sa iyang mga hampak.” Tungod kay, siya’y paga. . . Gitunglo siya, ug kinahanglan niyang antuson ang tunglo sa kapungot sa Dios kaniya, tungod kay gibaligya

man niya ang iyang kaputli ug mga katungod. Kita n'yo? Apan. . . Oh, grabe!

177 Apan, hinumdumi. Ingon nga nakita na kanang tanang kahintang, bisan pa niana nagsaad ang Dios, sa Joel 2:25, kung gusto ninyong isulat kana, “Sa kaulahiang mga adlaw. . .”

178 Sa dihang miingon Siya, “Kung unsay gibiyaan sa ulod nga dangaw-dangaw, gikaon sa ulod nga hantatawo; kung unsay gibiyaan sa ulod nga hantatawo, gikaon sa—sa mga dulon; kung unsay gikaon sa dulon. . .” Padayon hangtud, ang tanang insekto, mikamang nianang Iglesia ug gikaon Kini hangtud nga sa katapusan halos wala na’y bilin kondili usa na lang ka tuud. Matikdi! Kung unsay gibiyaan sa mga Romano, gikaon sa mga Lutheran; kung unsay gibiyaan sa mga Lutheran, gikaon ’sab sa mga Methodist; ug kung unsay gibiyaan sa mga Methodist, gikaon ’sab sa mga Pentecostal; kita n’yo, hangtud nga nahimo na lang kining usa ka tuud.

179 Ug kahibalo ba mo kung unsa? Tan-awa n’yo kana nga mga ulod dinha, ang dulon ug ang ulod nga hantatawo, ug uban pa, ug susiha ang mga niini diha sa—sa basahon, ug hibaloa. Ang mao gihapon kini nga ulod nga anaa lamang sa nagkalainlaing mga hugna niini.

180 Kupti lang ’sa ang inyong punto. Ingon niana usab kini nga Mga Selyo! Ang mao ra kini mismo nga mga ulod. Makita ra ninyo kini pag ipahayag na nato kini, busa isulti ko na kaninyo karon. Mao ra kini nga ulod, sa tanang panahon. Upat niadtong mga ulod; upat ’sab dinhi. Ug mao kana sila, sila ang mao gihapon nga butang. Mao gihapon kini nga espiritu. Kung unsay gibiyaan sa usa, gikaon pud sa usa; ug kung unsay gibiyaan *nining* usa, gikaon pud sa usa pa; ingon niana, hangtud nga gihimo nila kini nga usa ka tuud na lang.

181 Apan ang ingon ni Joel, “Akong ipasig-uli, nagaingon ang Ginoo, ang tanang mga tuig nga gikaon sa ulod nga hantatawo.”

182 Unsa man kini? Unsaon man Niya sa pagbuhat niini; kung nagsugod kini nga, anticristo, sa pagkahimong batok sa pagtulon-an ni Cristo, nga midawat og dogma imbis unta nga ang Pulong? Ug sulod sa daghang mga katuigan nanalagma ra niini ang mga repormador, sumala sa gisulti sa Biblia.

183 “Apan sa kaulahiang adlaw, sa pagtingog. . .” Pinadayag 10:1-7, ang ingon Niya, “Ang mga tinago sa Dios matapos na sa kaulahiang mga adlaw, sa pagtingog sa ikapitong manulonda.” Sa Malaquias 4, gikasulti nga Iyang “Ipadala si Elias sa dili pa moabot ang dautan nga adlaw sa ibabaw sa yuta, sa diha nga Iyang pagasunogon kini sama sa usa ka hudno. Ug ipasig-uli ni Elias, ug ipahibalik ang mga anak ngadto sa Pagtoo sa mga amahan,” Ang orihinal, apostolikanhong, Pentecostal nga Pagtoo gikasaad na nga igapanumbalik. Karon, kana’y ingon ka tataw sama sa pagkasulti niana sa Kasulatan. Bueno gikasaad

na kana. Ug kung ania na kita sa kaulahi-ang mga adlaw, aduna gayu'y mahitabo. Kita n'yo? Ug nagakahitabo na kana, ug nakita nato kana.

184 Himatikdi ang trinidad ni Satanas. Ang mao ra gihapon kini nga persona; nagpakatawo lang, gikan sa usa ngadto sa usa pa. Ingon niana usab ang gibuhat niadtong mga insekto, niadtong mga ulod, mibalhin lang gikan sa usa ka porma ngadto sa usa pa, eksakto gayud. Nicolaita, nahimong “espirituwal nga anticristo.” Nahimong Papa, nahimong “mini nga propeta.” Nahimong “Mapintas-nga-mananap,” ang mao mismong yawa, nga nagpakatawo lang. Dili niya mahimo kining . . .

185 Karon, timan-i n'yo kana karon, sa dihang ginasundan ninyo kini. Makita ninyo kining mga mangangabayo nga diretsong mopaingon niana. Kita n'yo, ginapakita ko kaninyo ang usa ka hulagway dinhi. Kung ma-drawing ko lang unta kini sa usa ka pisara, mas masabtan ninyo kini. Kita n'yo, nagatan-aw ako.

186 Una, karon. Timan-i ninyo kini. Ang unang butang kung unsa siya, siya'y usa ka “anticristo nga espiritu.” Mao kana'y giingon ni Juan. “Mga anak, ang espiritu sa anticristo nagalihok na sa mga anak sa pagkadili-masinugtanon.” Kita n'yo, hinay-hinay nang misugod kana nga butang. Ug dayon nahimo kana nga mora'g “usa ka panultihon,” sa misunod nga kapanahonan sa iglesia. Ug sa sunod nga kapanahonan sa iglesia, kana'y “usa na ka doktrina.” Ug sa sunod na 'sab nga kapanahonan sa iglesia, siya'y “gipurong-purongan na.” Karon dili ba kana ingon ka tataw nga mahimo n'yong mabasa kini sa bisan asa? Kita n'yo? Kita n'yo, tan-awa n'yo siya nga nagaabot.

187 Karon, una, gitawag siya nga (unsa?) “anticristo nga espiritu,” tungod kay batok man siya sa Pulong. Mao kana'y sinugdanan niini. Eksaktong mao kana ang nagpahinungdan sa tibuok butang, ang pagtalikod sa Pulong sa Dios. Dili tungod kay tingali'g gibunalan ni Eva si Cain usa ka adlaw kaniadto. Kita n'yo? Dili kana mao ang hinungdan. Ang unang butang nga nagpahinungdan sa tibuok butang, mao ang pagtalikod niya sa Pulong. Mitalikod siya sa Pulong. Ug ang unang butang, nga nagpasugod sa prostitusyon sulod sa iglesia sa buhi nga Dios, ang Pangasaw-onon ni Cristo, mitalikod kini sa Pulong ug gidawat ang Romanhong dogma imbis unta nga ang Pulong sa Dios. Unsa ma'y nahitabo sa tanang organisasyon? Gibuhat 'sab niini ang mao ra mismong butang.

188 Karon, apan gikasaad na nga sa kaulahi-ang mga adlaw mohimo ang Dios og pamaagi aron ipasig-uli. Ang Pulong sa Ginoo moabot ibabaw sa yuta, sama sa gibuhat Niya kaniadto sa sinugdanan, ug, oh, ug ipasig-uli (ang unsa?) ang sinugdanan niini. “Batok sa Pulong.” Ug unsa ma'y angay'ng buhaton niini nga tawo pagmoabot na siya, nga dinihogan sa Espiritu sa Dios? Iya lamang “ipahibalik ang Pagtoo sa mga anak ngadto

sa mga amahan.” Sa ingon nianang paagi Niya ipasig-uli. Ug pag dawaton n’yo kining mao ra nga Pulong, nga mao mismo kung unsa Kini *Dinhi*, magapamuhat Kini sa mao gihapon nga butang.

<sup>189</sup> Miingon si Jesus, “Kung ang si kinsa mang tawo Akoa! Ug ang nagatoo Kanako, ang mga buhat nga Akong ginabuhat iya usab pagabuhaton.” Ug sa dihang gihangyo nila Siya nga mobuhat og pipila ka mga butang, miingon Siya, “Ginabuhat Ko lamang kung unsay ipakita Kanako sa Amahan. Wala Ako nagabuhat og unsa man hangtud nga makita Ko kini, una. Kon unsay Akong makita nga ginabuhat sa Amahan, kana’y pagabuhaton Ko usab. Ang Amahan nagapangbuhat, ug dayon Ako nagapangbuhat hangtud karon.” Kita n’yo? Dili ba ninyo makita kana? Aba, sama lang kana sa pagbasa og mantalaan. Kita n’yo?

Karon, karon, una, dayon, nahimo siyang usa ka “anticristo.”

<sup>190</sup> Karon, dili siya mamahimong anticristo sa espiritu lamang. Dayon, nahimo siyang usa ka anticristo, ug kana nga espiritu migamit og usa ka tawo nga nagtudlo sa mao gihapong mga butang nga ginabuhat nianang anticristo nga espiritu, ug dayon nahimo siyang usa ka “mini nga propeta,” para sa anticristo nga espiritu. Karon unsa pud kaha ang usa ka tawo nga anaa sa usa ka organisasyon? Bahala na kamo. Wala ko kahibalo kung unsay hunahuna n’yo mahitungod niana. Bueno.

<sup>191</sup> Karon, sa katapusan, nahimo na siyang “usa ka mapintas-nga-mananap.” Karon hulat ‘sa, ug moadto kita dinha pagkataudtaud, kita n’yo. Bueno.

<sup>192</sup> Karon, ingon niana ang trinidad ni Satanas; si Satanas kana, sa tanang panahon. Si Satanas, “ang anticristo nga espiritu.” Anticristo nga espiritu, nagpakatawo ingon nga, “mini nga propeta.” Dayon, nahimong “ang mapintas-nga-mananap.” Kita n’yo? Sa dihang... Dili nga demonyo, ang anaa sa nianang anticristo; apan sa dihang gipalagpot na si Satanas mismo, mikanaug siya ug gikuha ang puwesto sa demonyo kaniadto. Ang yawa, dayon, kung ingon ana nagpakatawo sa usa ka tawo. Ginabalik-balik lang ang kaugalingon niini.

<sup>193</sup> Ingon niana usab si Judas Iscariote kaniadto. Ug unsa ma’y gibuhat niya? Usa ba siya sa mga tawo nga batok kang Cristo kaniadto? Aba, siya baya ang tinugyanan-sa-salapi, nga nag-uban-uban kang Jesus. Mao gyud. Nag-uban-uban mismo kanila. Nagsangyaw didto ug nagpagula pud og mga yawa, ug gibuhat mismo kung unsay gipangbuhat nila.

<sup>194</sup> Ug si Cristo mao ang nagpakatawo nga Dios; ang Dios, nagpakatawo sa unod, Emmanuel. Ug si Judas mao ang anak sa kalaglagan. Ug si Jesus mao’y Anak sa Dios. Ang Dios nga nagpakatawo; ang yawa usab nga nagpakatawo.

195 Ang ubang mga tawo tulo lamang ka krus ang nakita niadtong panahona. Aduna ma'y upat didto. Adunay tulo sa Golgota, nga maoy atong nakita. Si Jesus kadto nga anaa sa tunga, usa ka kawatan nga anaa sa Iyang wala, ug ang usa pud ka kawatan nga anaa sa Iyang tuo.

196 Ug matikdi. Miingon ang usa ka kawatan ngadto sa usa pa, o miingon kang Jesus, "Kung . . ." Karon, kabalo na mo nga Siya maoy ang Pulong. Apan, "Kung ikaw maoy ang Pulong, dili mo ba mahimong luwason ang imong kaugalingon? Dili ka ba mobuhat og unsa man lang mahitungod niini?"

197 Mao ra gihapon karong panahona. Wala ba ninyo madungog kining karaan nang mga yawa nga moduol, og moingon, "Kung nagatoo ka sa Balaanong pagpang-ayo, *ania* ang mga mata sa kung kinsa nga tawo, nganong dili mo ablihan ang ilang mga mata?" "Butahi ako! Butahi ako!" Mao gihapon kana nga karaang yawa. Kita n'yo? "Kanaug diha sa krus, og motoo kami Kanimo." "Kung Ikaw maoy ang Anak sa Dios, nan himoang tinapay kining mga bato." Mao gihapon nga yawa.

198 Pagpahilayo na lang mo, kita n'yo. Wala. Ingon niana man ang gibuhay ni Jesus kaniadto. Wala gayud Siya nagpa-uto sa kang bisan kinsa man kanila.

199 Gitabonan og trapo ang Iyang kamot. . . gitabonan ang bililhon Niyang mga mata, nga sama *niana*. Ug mikuha sila og bunal, ug gibunalan Siya sa ulo. Miingon, "Sultihi kami! Kung usa Ikaw ka propeta, karon sultihi kami kung kinsay nagbunal Kanimo." Gipasa-pasa nila dayon ang bunal, sa usa'g usa. "Karon sultihi kami kung kinsay nagbunal Kanimo, ug motoo na kami nga usa gyud diay Ka ka propeta." Wala gayud Niya gibuka ang Iyang baba. Naglingkod lang Siya didto. Kita n'yo? Wala Siya nagpa-uto. Ginabuhat lang Niya kung unsay gisulti sa Amahan, nakita n'yo. Kita n'yo? Gipasagdan ra sila nga magpadayon. Taliabot na ang ilang oras. Ayaw kabalaka. Oo, Sir. Bueno, nahikap man nila ang Iyang bisti, og wala man lang sila'y nabati nga gahum.

200 Apan ang usa ka kabus og luoy'ng babaye, nga adunay panginahanglanon kaniadto, ang mihikap lamang sa Iyang bisti. Milingi Siya ug miingon, "Kinsa ma'y mihikap Kanako?" Uh-huh. Unsa man kadto? Usa kadto ka lahi nga paghikap. Nakadepende kini kung giunsa mo Siya paghikap, nakita n'yo, kita n'yo, kung nagatoo ba gyud ka. Karon, nakita n'yo?

201 Karon, ingon nga si Satanas. . . nagpakatawo sa iyang kaugalingon, gikan sa pagka-anticristo ngadto sa pagka-mini nga propeta karon. Ug sa mga adlaw sa Judeo, siya'y "anticristo," taliwala sa iglesia sa nahaunang panahon. Sa niadtong mangiub nga kapanahonan, nahimo siyang usa ka "mini nga propeta," sa kalibutan. Tan-awa ninyo siya nga



bitbit ang “iyang copa sa pagkadautan”? Karon, mao kana’y sa kapanahonan sa iglesia karon.

<sup>202</sup> Apan sa kapanahonan human nga Mipauli na ang Iglesia, mamahimo na sab siyang usa ka mapintas-nga-mananap, mamahimo siyang yawa nga nagpakatawo, ang mapula nga dragon mismo. Oh, grabe! Dili ba ninyo makita ang buut kong ipasabot? Magpakatawo siya diha sa iyang mga tawo nianang panahona. Nagapus niya ang iyang mga tawo pinaagi sa iyang gahum. Ang mini nga propeta magapropesiya kanila aron mopaingon sila niana. “Igatugyan sila ngadto sa gahum sa pagkahisalaag, aron managpanoo sa bakak ug pagahukman tungod niini.” “Ginapanghimakak ang Pulong; nga may dagway sa pagkadiosnon.”

<sup>203</sup> Ang Dios nagapamuhat pud, sa Iyang katungdanan, diha sa trinidad. Pagpakamatarung; pagpakabalaan; ug nagpakatawo sa Iyang Kaugalingon diha sa Iyang katawhan, pinaagi sa bautismo sa Espiritu Santo.

<sup>204</sup> Mao sab gihapon, ang yawa nga ginaawat-awat lang, si Cristo. Oh, nagpakatawo usab si Satanas sa iyang kaugalingon. . . Karon matikdi. Si Satanas. . .

<sup>205</sup> Sa dihang nagpakatawo si Jesus sa Iyang Kaugalingon diha sa Iyang katawhan, ang mismong Kinabuhi nga anaa kang Cristo anaa usab sa maong tawo.

<sup>206</sup> Unsa kaha’y mahitabo kung kuhaon mo ang kinabuhi gikan sa punoan sa ubas ug ibutang kini sa punoan sa kalabasa? Dili na kini mamunga pa og mga kalabasa; mamunga na kini og mga ubas. Unsa kaha kung kuhaon mo usab ang kinabuhi gikan sa punoan sa melokoton ug ibutang kini sa punoan sa peras? Mamunga pa kaha kini og mga peras? Dili. Mamunga na kini og mga melokoton. Ang maong kinabuhi ang nagasulti kung unsa kini. Kita n’yo?

<sup>207</sup> Pagmoingon mo, madungog n’yo ang mga tawo nga moingon nga nadawat na kono nila ang Espiritu Santo, ug ginapanghimakak kining Pulong, nan aduna gyu’y butang nga sayup. Ang Espiritu Santo ang nagsulat nianang Pulong.

<sup>208</sup> Ug gisulti kini ni Jesus, “Kung ang usa ka tawo aduna kaniya ang Akong Espiritu, pagabuhaton niya ang Akong mga buhat.” Gusto n’yo bang basahon kana? Gusto n’yo bang isulat kana? Kini’y sa Juan 14:12. Oo. Bueno. “Ang nagatoo Kanako, ang mga buhat nga Akong ginabuhat iya usab pagabuhaton. Gani mas daghan pa niini ang pagabuhaton niya, kay Ako moadto sa Amahan.” Kita n’yo? Dayon Iyang ginabalaan ug ginahinloan siya, aron makabarug siya sa atubangan sa Dios. Mahulog man kanang tulo sa tinta dinha, ug dalhon gihapon siya patabok sa dalama. Kita n’yo?

<sup>209</sup> Karon matikdi. Si Satanas, sa dihang nagpakatawo siya sa iyang kaugalingon diha sa iyang mga ginsakupan, ginabuhat

puud nila ang buhat nga gibuhath niya. Dili ba ninyo makita? Unsa ma'y gibuhath niya? Miadto mismo niadtong inosenteng babaye, aron limbongan kini. Ug eksaktong ingon niana usab ang ginabuhath sa uban niining mga yawa, moadto mismo sa usa ka dapit ug moingon. . . Usa ka kabus ra nga pastor nga nagasugod pa lang, dinha sa kung asa man; duolon niya kini ug moingon, "Oh, kung magpamiyembro ka lang sa amoa!" Huh! Huh! Nagapamuhath sa gihapon ang mao ra nga yawa. Karon, mao kana ang Kamatuoran! Ug sa diha nga nagpakatawo si Satanas diha sa iyang iglesia, aron mamahimong yawa, kung ingon-niana sila kadtong mga nagapangbuno ug nagapamatay, ug uban pa. Tungod kay, si Satanas usa man ka tigpamatay, sa una pa lang; usa ka bakakon ug usa ka. . . Kita n'yo? Bueno.

<sup>210</sup> Unsa ma'y gibuhath ni Satanas sa dihang iyang, sa dihang nagpakatawo siya sa taliwala sa mga tawo? Katungdanan niya nga mahimong maliputon. Siya'y maliputon gayud. Susiha ninyo ang Biblia, ug ipakita n'yo kanako kung nakighilambigit ba ang Dios sukad-sukad sa intelektuwal nga mga tawo. Pangitaa kana, ug tan-awa kung dili ba gyud ang mga intelektuwal sa kanunay ang mao'y mga gipangyawaan. Mabug-at kini nga pagpanulti, apan tinuod kini. Ginahagit ko kamo nga susiha ang—ang kaliwatan, ni Abel kumpara kang Cain; ug, sa katorse ka kaliwatan, subaya kini, ug hibaloa kung kinsa ba sa duha ang maalamon, ug kung kinsa usab kanila ang mga mapainubsanon. Uh-huh.

<sup>211</sup> Nganong wala man nagpili si Jesus og ingon-ana nga mga tawo kaniadto? Nagpili hinoon Siya og mga mangingisda ug mga kalalaken-an nga dili gani makasulat sa kaugalingon nilang ngalan, aron ibutang sila ingon nga lider sa Iyang Iglesia. Husto kana. Walay kapuslanan ang—ang kaalam; kini'y—batok kini kang Cristo. Ang kalibutanong kaalam batok gyud kang Cristo, sa kanunay. Wala gayud 'ta sukad gisultihan ni Jesus nga magtukod og mga seminaryo; wala Niya gisulti kini; nga magkaaduna og mga eskwelahan pang-Biblia. Ang ingon Niya, "Iwali ang Pulong! Iwali ang Maayong Balita!" Ug dayon kung miingon Siya, "Kini nga mga ilhanan maganunot kanila nga nagatoo," kita n'yo, kinahanglan mong mabatonan ang. . . Sa laing pagkasulti, miingon Siya, "Lakaw og ipadayag ang Gahum sa Dios, ngadto sa tanang mga kanasuran."

<sup>212</sup> Karon matikdi. Ang katungdanan ni Satanas mao ang pagtuis sa Pulong sa Dios, para sa pang-kinaalam nga mga pagpangatarungan. Oh, grabe! Oh! Dayon ginamarkahan niya ang iyang mga ginsakupan, pinaagi sa pagsalikway sa orihinal nga Pulong. Karon tugoti nga. . .

<sup>213</sup> Mahimo n'yo—mahimo n'yo—mahimo n'yo ba akong tugotan og diyutay pa, aron tapuson kini? Kini, dili ko gustong masayloan ninyo kini. Tugoti kong ipakita kaninyo ang tipo, aron makita n'yo kining tanan diha sa pagtipo ug diha sa Pulong,

ug tanan na. Kamo—dili kamo. . . Dili mo angay'ng manguli na lang nga may kalibog.

<sup>214</sup> Sa Daang Tugon, pag nabaligya na ang usa ka tawo ngadto sa pagkaulipon. Adunay nagaabot nga tuig sa jubileo, sa kada singkwenta ka tuig. Ikakuwarenta'y-nuebe ka tuig, ug pagkahuman ang tuig na sa jubileo. Ug pag madungog kini sa usa ka ulipon, ug kung gusto gyud niyang makahilwas, wala—wala na'y bisan unsa pa ang makapugong kaniya. Puede na niyang isalibay ang iyang guna, ug moingon, “adyos,” og makapauli na siya. Pagkatingog sa trumpeta. Husto kana.

<sup>215</sup> Apan kung dili siya gustong mouli, ug kuntento gihapon siya nga magpaulipon sa iyang agalon, kung ingon-ana dalhon siya ngadto sa—sa—sa templo, ug mokuha sila og usa ka igtutuhog. . . Kabalo na mo kung unsa kanang usa ka igtutuhog. Ug dut-an nila ang iyang dalunggan, ug bangagan ang iyang dalunggan. Ug usa kini ka marka, nga dili na gayud siya makabalik pa. Husto ba kana? Kinahanglan niyang alagaran kini nga agalon sa tanang panahon. Dili ko igsapayan kung pila pa ka higayon motingog ang jubileo, bisan unsa pa'y mahitabo. Bug-os na gayud niyang gibaligya ang—ang iyang mga katungod, nga makahilwas.

<sup>216</sup> Ug sa diha nga isalikway sa usa ka tawo ang Ebanghelyong Kamatuoran, markahan sab siya ni Satanas (asa man?) sa iyang dalunggan. Himoon siya niining bungol aron nga dili na niya mapatalinghugan ang Kamatuoran, ug tapos na siya. Magpabilin na gyud siya sa grupo nga iyang giapilan, kung dili niya patalinghugan ang Kamatuoran. Dili.

<sup>217</sup> “Mahibalo kamo sa Kamatuoran, ug ang Kamatuoran magahatag kaninyo'g kagawasan.” Kita n'yo, ang Kamatuoran ang nagapahilwas.

<sup>218</sup> Ginamarkahan usab sa Dios ang mga Iyaha pagmodoul sila. Ginamarkahan sa Dios ang mga Iyaha pinaagi sa pagpanghimatuod sa Iyang gisaad nga Pulong diha kanila. Eksakto gyud kana, San Juan 14:12. Ug ang usa pa ka butang, kon gusto ninyong isulat, Marcos 16. Miingon si Jesus, “Kini nga mga ilhanan maganunot kanila nga nagatoo.”

<sup>219</sup> Karon hisgotan lang nato kana, sa makadiyut. Nagbinuang ba Siya? [Nagaingon ang kongregasyon, “Wala.”—Ed.] Ang buut gipasabot lang ba Niya ang. . . Ang buut gipasabot lang ba Niya niana mao ang mga apostoles, sama sa ginaingon sa uban kanato? [“Dili.”]

<sup>220</sup> Matikdi. Basaha ninyo ang basihanan niini. “Panglakaw kamo ngadto sa. . .” Asa man? [Nagaingon ang kongregasyon, “Sa tibuok kalibutan.”—Ed.] “Sa tibuok kalibutan.” “Iwali ang. . . kining Maayong Balita ngadto sa. . .” Unsa man? [“Sa tanang binuhat.”] “Sa tanang binuhat.” Wala pa gani kini nakadangat sa usa sa tulo ka bahin niini. “Kini nga mga ilhanan maganunot sa tibuok kalibutan, ngadto sa tanang binuhat, sa

bisan asa man igawali kining Maayong Balita. Kini nga mga ilhanan maganunot kanila nga nagatoo,” dili lamang ngadto sa pipila.

221 Sama sa usa ka tawo nga nagasulti kanako usa niadto ka higayon, “Gihatagan sa Dios ang dose lamang ka apostoles og mga gasa sa pagpang-ayo. Ug . . .” Oh! Ug, daghan sa mga kaigsoonan ang atua didto niadtong mitindog siya aron isulti kana, kita n’yo. Napul-an ra pud siya niadto, sa pipila ka minuto.

222 Busa karon matikdi, “Sa tibuok kalibutan, sa tanang binuhat, kini nga mga ilhanan maganunot.”

223 Ayaw gyud ninyo dawata ang dili-pagtoo nga marka ni Satanas. Karon, ibutang niya kana diha kaninyo karong gabhiona, kung mahimo niya. Dumbolon niya kamo diha sa bungbong, ug mogawas mo ug moingon, “Wala ako kahibalo mahitungod niana.”

224 Panguli mo ug tun-i Kini, ug dayon magmatinuuron, ug mag-ampo. Tungod kay, ang tanan-tanan pagkahingpit gayud—gayud nga sumala sa Kasulatan niining taknaa mismo, niining sagrado nga takna sa panahon. Sulod sa pila ka mga tuig human na kining, napamatud-an, og midangat na kita mismo niini. Ug mao na kini ang takna. Mao na kini ang panahon.

225 Ug karon ayaw gyud ninyo siya tugoti nga idul-it kana sa inyong igdulongog, ang iyang dili-pagtoo nga marka. Kita n’yo? Tungod, siya’y usa man ka dili-magtotoo, sa sugod pa lang. Giduhaduhan niya Kini. Oo. Oh, ayaw gyud tugoti bisan og . . . Ayaw gyud siya tugoti nga gamiton ang Kasulatan, pinaagi sa iyang kaalam, ug—ug lubagon Kini ug tuison Kini pinaagi sa kaugalingon niyang kaalam, ngadto sa mga gahum sa pagpangatarungan. Magmapainubsanon lamang kamo, ug moingon, “Mao na kana’y giingon sa Dios, ug mao lang gayud kana.” Karon, oh, atong . . .

226 Malangan na gyud ta ani og ayo, busa mas maayo nga mohunong na ta dinhi mismo ug—ug sugdan na kini.

227 Moadto na ta karon sa Ikaduhang Selyo. Sa diha nga ang gipatay, nabanhaw nga Cordero nag-abli na niini, ug ang ikaduhang, Mananap nga mora’g-baka, miingon, “Umari ka, tan-awa kung unsa ang misteryo sa Selyo.” Kita n’yo? Karon nasabtan na nato kini. Ang Cordero, hinumdumi, kinahanglan nga ablihan Niya ang matag Selyo. Ug ang ikaduhang Mananap . . .

228 Kung namatikdan n’yo kini, sa naandan na kon diin bag-ohay lang kitang nahuman, sa mga kapanahonan sa iglesia, mao gihapong butang. Ang ikaduha . . . Una mao ang usa ka leon; ang sunod mao’y usa—mao’y usa . . . mora’g usa ka baka, o laking baka, o ingon-niana, nakita n’yo.

229 Ug miingon kini nga Mananap, “Umari ka, tan-awa,” karon, ug giablihan sa Cordero ang maong Selyo. Ug, pagkahuman, miduol siya aron tan-awon. Ug sa pagduol niya, unsa ma’y nahitabo? Tan-awon nato karon kung unsay nakita niya. “Umari ka, tan-awa.” Adunay usa ka selyado nga misteryo dinhi, nga dugay nang ania niini sulod sa duha ka libo ka tuig, halos. Tan-awon nato kung unsa gyud kini.

230 Karon nahibaloan pud nato dinhi nga nakita niya ang (unsa man?) usa ka pula nga kabayo nga migawas. Karon, sa akong pagsabot niini, sa akong pagsabot, kining dakung espada nga bitbit niya diha sa iyang kamot. . . Karon aduna ta’y tulo ka butang nga pagatan-awon karon, sa mga mosunod nga kinse, baynte minutos. Basahon ‘sa nato ug tan-awon kung unsay gisulti Niya dinhi. “Ug adunay migula . . .” Sa ika-4 nga bersekulo.

*. . . migula ang lain na usab nga kabayo nga mapula, (puti man ang unang kabayo): ug ang nagkabayo niini gitugotan sa pagwagtang sa pagdinaitay gikan sa yuta, . . . aron ang mga tawo magpinatyanay ang usa sa usa: ug siya gihatagan og usa ka dakung espada.*

231 Karon adunay mga simbolo dinhi, ug gusto natong tan-awon og ayo ang mga niini. Apan, sa akong pagsabot, sa pinakamaayong nahibalon ko karon, nakita n’yo, gitagna na ni Jesus ang mao gihapong butang diha sa Mateo 24. Kita n’yo? Miingon Siya, “Karon makadungog kamo og mga gubat ug mga dungogdungog mahitungod sa mga gubat, ug mga gubat gayud ug mga dungogdungog mahitungod sa mga gubat, ug mga gubat. Ug, apan,” miingon, “kining tanan dili pa mao. Kita n’yo, dili pa mao ang panahon.” Kita n’yo, gipangutana nila si Jesus og tulo ka pangutana. Kita n’yo? Ug gitubag pud Niya sila sa tulo ka pangutana.

232 Dinha kon diin daghan sa atong mga kaigsoonan ang nangalibog, gapaniguha nga ibutang. . . Ang mga kaigsoonang Adventist, mahitungod sa, ikapitong adlaw ug uban pa, dinha, ang. . . “Alaut gayud ang mabdos, ang nagapasuso, ug ang mga pultahan pagasirhan sa adlaw’ng igpapahulay,” ug mga ingon-anang butang. Aba! Wala man lang gani kana’y kahilambigitan sa maong pangutana, kita n’yo, wala gayud. Kita n’yo?

233 Gitubag man Niya kung unsay ilang gipangutana, apan wala Niya—wala Niya—wala Niya kini tanan gipahinungod sa kaulahiing mga adlaw. Ingon Siya, “Makadungog kamo. . .” Karon nagahisgot pa kita niining usa ka butang dinhi. Modangat kita sa uban pa niini, sa pipila pa ka gabii. Tan-awa. Ingon Siya, “Makadungog kamo og mga gubat, ug mga dungogdungog mahitungod sa mga gubat, ug uban pa. Dayon kining tanan dili pa. . . Kita n’yo, dayon sila’y—sila’y mobalik pag-usab,

pagkahuman luwason nila kamo, ug uban pa nga sama niini. Ug ang tanan, ang tanan niini dili pa mahitabo.”

<sup>234</sup> Apan sa diha nga miabot na Siya sa oras nga magpakigsulti na Siya kanila mahitungod sa kung unsay gipangutana nila Kaniya mahitungod sa, “katapusan sa kalibutan.”

<sup>235</sup> “Kanus-a man kining mga butanga mahitabo, sa diha nga wala na’y bisag usa ka bato nga mahibilin sa nahimutangan niini? Unsa man ang mamahimong ilhanan? Ug kanus-a man moabot, ang katapusan sa kalibutan?” Kita n’yo, gipangutana nila Siya og tulo ka butang.

Dayon sa dihang miabot na Siya sa, “Ang katapusan sa kalibutan?”

<sup>236</sup> Miingon Siya, “Pag makita ninyo ang kahoy’ng higuera nga nagapanalingsing na, karon masayran ninyo nga ang oras anaa na sa pultahan. Ug sa pagkatinuod magaingon Ako kaninyo, nga, dili pa mahanaw kining kaliwatana hangtud nga ang tanan mamatuman.” Daw sa unsa nga ang ateista, nga wala ang interpretasyon, gusto ganing mosalig niana! Kita n’yo? Ingon Siya, “Kining kaliwatana,” dili ang kaliwatan nga Iyang ginasultihan, “ang kaliwatan nga makakita sa kahoy’ng higuera nga nagapanalingsing na.”

<sup>237</sup> Karon aduna lang ko’y gustong ipangutana kaninyo. Tan-awa lang—lang ang usa ka butang nga ania mismo sa atong atubangan. Ang Israel sa karon, sa unang higayon sulod sa baynte-singko ka gatus ka tuig, usa na ka nasud. Ang pinaka-karaang bandila sa kalibutan nagakayab-kayab na sa Jerusalem niining gabhiona. Ang Israel anaa na sa iyang yutang-natawhan.

<sup>238</sup> Adunay usa ka igsoong lalaki dinhi usa niadto ka higayon ang gustong mamahimong usa ka misyonaryo, og mibati gayud nga moadto siya didto ingon nga usa ka misyonaryo ngadto sa mga Judeo. Ingon ko, “Tingali’g makakabig ka ra og usa karon ug unya.” Oh, abi sa mga tawo, nga mahimo nila kini sa tibuok nasud! Dili, sir.

<sup>239</sup> Makabig lamang ang Israel ingon nga usa ka nasud, dili ingon nga usa ra ka tawo. “Usa ka nasud ang mahimugso sa usa ka adlaw.” Ang Israel kana. “Maluwas ang tibuok Israel.” Hinumdumi lang ninyo kana. Mao kana’y giingon ni Pablo, “Ang tibuok Israel luwas.” Karon matikdi, “Ang tibuok Israel.” Eksakto gyud kana.

<sup>240</sup> Karon matikdi kini. “Apan,” ang ingon Niya, “pagmakita na ninyo ang kahoy’ng higuera, ug ang tanang uban pa nga mga kahoy, nga nagapanalingsing.” Karon himatikdi. Wala gayud ni usa ka higayon sukad, sulod sa baynte-singko ka gatus ka tuig, nga mipauli ang Israel ngadto sa iyang yutang-natawhan. Aduna kita og hamubong salida niana, nga *Three Minutes To Midnight*, kabalo na mo. Atua siya, nga usa na ka nasud, ang bitoon ni

David nga may unom-ka-tumoy, nagakayab-kayab na, ug tanan na niining mga butanga.

<sup>241</sup> Aduna ba og usa ka higayon sukad nga ang mga denominasyon nagkaaduna pa og mga rebaybal sama sa ilang gipahigayon sa nangaging pipila ka mga tuig? Karon tun-i ninyo kini. Miabot na kita.

<sup>242</sup> Kanus-a ba sukad milambo ang mga denominasyon ilalum sa ministerio sa kang kinsa man nga tawo, sama nga milambo kini kang Billy Graham; mga Methodist, mga Baptist, ug uban pa? Kanus-a ba sukad nagkaaduna og usa ka tawo, susiha n'yo ang inyong kasaysayan, nga nagsangyaw sa iglesiang pormal, nga ang iyang ngalan naghinapos og h-a-m, kaniadto? Gipangutana ko lang kamo. A-b-e. . .

<sup>243</sup> A-b-r-a-h-a-m. Karon tan-awa, adunay pito ka letra ang ngalan ni Abraham, A-b-r-a-h-a-m.

<sup>244</sup> Apan ang atong Igsoong si Billy Graham, G-r-a-h-a-m, adunay unom, dili pito. Sa kalibutan, dinha siya nagapangalagad sa, iglesiang natural.

<sup>245</sup> Ang iglesiang natural, mao si Lot, kaniadto sa Sodoma. Ug sa dihang miadto kini nga tawo didto ug nagwali, ug gibutahan sila sa Maayong Balita.

<sup>246</sup> Apan adunay Usa Nga nagpabilin kang Abraham, ug gitawag Siya ni Abraham nga, "Elohim, Ginoo." Bueno sa dihang nakita ni Abraham ang tulo nga nagaabot, ingon niya, "Akong Ginoo."

<sup>247</sup> Sa dihang nakita 'sab ni Lot ang duha nga nagaabot, ingon niya, "Akong mga ginoo." Tan-awa ang kalahian. Nakita n'yo na ang inyong pang-trinidad nga buhat? Kita n'yo?

<sup>248</sup> Miingon si Jesus, "Maingon sa nahitabo kaniadto sa mga adlaw ni Lot." Nakita n'yo kana? Matikdi. Hunahunaa kini.

<sup>249</sup> Karon, aduna usab og Usa nga miadto sa espirituhanong Iglesia, ang Pangasaw-onon, si Abraham, nga wala sa—sa Sodoma, sa sugod pa lang. Ug matikdi n'yo kung unsay Iyang gibuhat. Wala Siya naghimo og unsa man nga pagwali sama sa gibuhat nila. Nagtudlo Siya kanila, apan pagkahuman niadto adunay gipakita kanila nga ilhanan sa atubangan nila. Nagpakita Siya og ilhanan nga iya sa Mesias. Nakatalikod Siya sa balongbalong, ug miingon Siya, "Abraham." Karon hinumdumi, nga ang tinuod niya nga ngalan, pipila ka adlaw sa wala pa kadto, mao si Abram. Apan ingon Siya, "Abraham, asa ba ang imong asawa, nga si S-a-r-a-h?" Pipila ka adlaw sa wala pa kadto, gitawag kini nga S-a-r-r-a.

Miingon si Abraham, "Anaa siya sulod sa balongbalong, sa likod Mo."

<sup>250</sup> Ug miingon Siya, "Abraham, Ako. . ." Anaa na usab ang personal nga puli-ngalan. "Pagaduawon Ko ikaw sumala sa

Akong saad nga gikasaad Ko kanimo.” Nakita ninyo kung unsa kadto. Kita n’yo? Usa ka Tawo, nga naabogan ang Iyang bisti, nagakaon og karne sa usa ka nati nga baka, ug nagainom og gatas gikan sa baka, ug nagakaon og tinapay nga hinimo sa mais. Oo, sir. Ang Dios, si Elohim, nga napadayag diha sa unod!

<sup>251</sup> Gikasaad na, sa kaulahiing mga adlaw, nga ipadayag Niya ang Iyang Kaugalingon diha sa unod pag-usab! Matikdi.

“Abraham, asa ba ang imong asawa, nga si Sarah?”

“Anaa siya sulod sa balongbalong, sa likod Mo.”

Miingon, “Pagaduawon Ko ikaw.”

<sup>252</sup> Ug ang maong babaye, siyempre, ingon nga usa ka gatus na ang panuigon, medyo mikatawa siya nga hilum; luyo sa balongbalong kaniadto, luyo sa mga tabil sa balongbalong. Ingon siya, “Ako, nga usa ka tigulang na nga babaye.” Bueno, wala na kadto sa ilang duha, ingon nga bana ug asawa, dugay na nga mga tuig, kabalo na mo, tungod nga si Abraham usa ka gatus na ang panuigon, ug—ug—ug si Sarah usab nubenta na. Ingon pa, “Dili gayud kana mahitabo.”

<sup>253</sup> Ug ingon Niya, “Nganong mikatawa man siya?” Whew! Nakatalikod Siya sa balongbalong, “Nganong mikatawa man siya, nga nagaingon, ‘Unsaon man pagkahitabo niining mga butanga?’” Kita n’yo, nagpakita Siya kaniya og usa ka ilhanan.

<sup>254</sup> Karon gikasaad Niya nga mautro kini sa katapusang panahon, pag-usab.

<sup>255</sup> Ug miadto didto ang duha ka lalaki ug giwali ang Pulong, ug gisultihan sila nga mopahigawas na didto; tungod nga ang maong dapit pagasunogon na, ug uban pa. Ug nahitabo gyud kadto. Ug nagarasay pagawas si Lot; ang iglesiang natural, didto sa sala, ug sa kalapukan, apan bisan pa niana naningkamot gihapon sa ilang mga programang pang-organisasyon. Apan ang Pangasaw-onon . . .

<sup>256</sup> Kana nga Tawo wala gayud miadto kanila. Siya’y miadto lamang ug gitawag ang maong tipo sa Pangasaw-onon. Karon ania na kita sa kaulahiing mga adlaw. Kita n’yo? Karon matikdi.

“Miingon ka dinha, ‘Ang Dios, nga napadayag diha sa unod?’”

<sup>257</sup> Miingon si Jesus, Mismo, “Unsaon man ninyo paghukom Kanako?” Miingon, “Dili ba nahisulat man kini sa inyong Biblia, sa inyong kabalaoran, nga sila, ang mga propeta, kang kinsa miabot ang Pulong sa Dios . . .” Ingon si Jesus, “Ang Pulong miabot ngadto sa mga propeta,” tungod kay nagasubay man Siya sa Kasulatan sa tanang butang. Ingon Siya, “Karon, nagaingon ang Pulong sa Dios, nga, ‘Ang Pulong miabot ngadto sa mga propeta.’ Ug gitawag ninyo sila nga ‘mga dios,’ tungod nga miabot man kanila ang Pulong sa Dios.” Ingon pa, “Kung ingon-



ana unsaon man ninyo paghukom Kanako kon Ako moingon nga Ako ang Anak sa Dios?” Gamit ang ila mismong balaod, gipakgang Niya sila. Tan-awa. Kita n’yo?

<sup>258</sup> Karon asa na man kita? Ania na kita sa katapusang panahon. Karon paminaw mo’g ayo ha.

<sup>259</sup> Karon hingsayran nato nga magkaaduna og mga gubat ug mga dungogdungog mahitungod sa mga gubat. Ug karon makita nato nga ang kahoy’ng higuera nanalingsing na. Ug ang ubang mga kahoy usab nanalingsing na. Ang mga Methodist, mga Baptist, mga Presbyterian, ug ang tanan, nanalingsing na, usa ka dakung rebaybal ang nagakahitabo.

<sup>260</sup> Karon nagatoo ko nga ginatigum na sa Dios ang Pangasaw-onon para nianang kaulahiing takna, ang Pinili. Oh, pagkamaanindot! Karon matikdi.

<sup>261</sup> Atong palandungon karon ang nakita ni Juan, dayon, kining mga butang nga iyang nakita. “Usa ka pula nga kabayo; ug migula ang mangangabayo niini, gihatagan kini og gahum aron mopatay pinaagi sa usa ka espada.” Karon ania ang kapadayagan ko mahatungod niini. Kini’y si Satanas, na usab. Kini’y ang yawa, na usab, sa lahi nga porma. Karon, hingsayran nato nga—nga ang Mga Selyo nagpahinungod... sa gikaingon ko na niadtong miaging gabii. Ug ang mga trumpeta nagapahinungod sa—sa—sa—sa mga gubat sibil, nakita n’yo, sa mga tawo, tali sa mga kanasuran. Apan inyong nahibaloan, dinhi, nga kini nga tawo adunay usa ka espada, busa nagapahinungod siya sa iglesia, gubat pang-pulitika. Karon tingali’g dili ninyo mahunahuna kana, apan matikdi lang kini sa makadiyut, sa pipila ka minuto.

<sup>262</sup> Matikdi ang pag-usab-usab sa kolor niini nga mga kabayo. Mao ra ang mangangabayo; naga-usab lang ang kolor sa mga kabayo. Ug ang kabayo usa ka mananap. Ug ang mananap, sa Biblia, ilalum sa usa ka simbolo, nagarepresentar og gahum. Mao gihapon nga sistema ang nagasakay sa usa na usab ka kolor, gahum, gikan sa pagka-inosente nga puti ngadto sa dugoon nga pula. Kita n’yo? Matikdi siya karon, ang paagi niya sa pag-abot.

<sup>263</sup> Sa dihang una siyang misugod, siya’y, bueno, siya’y usa lamang ka diyutay’ng doktrina sa—sa, diha sa, gitawag og Nicolaitanismo. Siyempre, dili kana makapatay og unsa man. Kana’y sa Pinadayag 2:6, kung gusto ninyong isulat kana. Dili siya makapatay og unsa man. Usa lamang kadto ka doktrina, usa lamang ka espiritu taliwala sa mga tawo. Karon, dili siya mopatay og unsa man. Oh, siya’y inosente kaayo, nga nagasakay sa niining puti nga kabayo. “Bueno, kabalo mo, mahimo kitang magkaaduna og usa ka dakung pangtibuok-kalibutan nga iglesia. Mahimo natong tawgon kini nga pangtibuok-kalibutan nga iglesia.” Ingon niana sila sa gihapon. Oo. Kita n’yo? Karon, “Mahimo kitang magkaaduna...” Oh, pagka-inosente gayud

niini. Ug, oh, inosente kaayo kini. “Usa lamang kini ka pundok sa mga kalalaken-an. Maghiusa kitang tanan para sa pagpakig-fellowship.” Kita n’yo, inosente gyud kaayo; maputi, ingon niana ang puti nga kabayo. Kita n’yo?

264 Karon, busa ang mga iladong tawo, ug ang mga mas maayo’g binistihan, ug ang mga edukado, kabalo na mo, nga daw sama sa mga-langgam-nga-managsamang-balahibo, kabalo na mo, “Medyo atong—atong hiusahon ang maong mga butang. Ug kanang kabus nga pundok, aba, kung gusto nilang moapil, bueno, okey ra man, pero atong—atong—atong pilion ang mas maayo’g kahintang nga mga tawo nga motabong sa atong iglesia. Kung mahimo lang natong mapagawas ang atong mga kaugalingon gikan dinhi, kita’y—kita’y mamahimong usa—kita’y mamahimong usa ka pundok sa mga Mason, o uban pa, kabalo na mo. Atong—atong gyud mahan-ay kini nga mga butang og mas maayo, o, sama niining Odd Fellows,” kung unsa man kini. Ug busa. . . Dili kanang Odd Fellow Lodge ha, apan kabalo na mo kung unsay akong pasabot. Busa, salikwaut kini para sa tinuod nga magtotoo. Karon, apan, sa laing paagi, sa laing pagkasulti, “Gusto namo og usa ka gamay’ng grupo, usa ka gamay’ng kapunungan nga matawag namo nga amoa.” Usa pa lang kadto ka doktrina, inosente kaayo. “Mga igsoon, aba, wala kami og unsa man nga batok kaninyong mga tawo, wala gayud. Okey man kamo, apan, kabalo mo, nabati man gud namo nga—nga aduna kami buluhaton ug ang matag. . . Kami, mas maayo kung kami lang mismo ang magkauban.” Kita n’yo? Sa kaulahian nagpadayon kadto hangtud nga nahitabo kana, oo, sir, nagkahiusa sila.

265 Apan sa diha nga kining makuyaw, og malimbongon nga espiritu (oh, aba!) nagpakatawo, espiritung nagpakatawo; kining espiritu sa doktrina, aron pulihan si Cristo, nga nahimo nang tawo. Mao nga kinahanglan na kini simbahon, kung ingon-ana, nahimo nang silimbahon nga sama ni Cristo. Sa laing pagkasulti, didto sa Vatican. . . Nakaadto na ko didto. Nahisulat ang ingon-niini, “VICARIVS FILII DEI,” ug nahisulat kini sa mga numerong Romano. Karon, mag-drawing ka lang og usa ka linya ilalum nianang mga numerong Romano. Ug nagakahulogan kini og, “Salili sa Anak sa Dios.” Si Satanas, sa laing pagkasulti, siya’y usa ka bikaryo. Kabalo na mo kung unsa ang bikaryo; ang tigpuli ngadto sa kung unsa man. Siya mao ang bikaryo, “Salili sa Anak sa Dios.”

266 Ug miingon ang Biblia, “Kaniya nga may gasa sa kaalam ipakuwenta ang numero sa mapintas nga mananap, kay kini mao’y numero sa tawo. Ug ang iyang numero unom ka gatus ug kan-uman ug unom.” Karon, isulat n’yo ang VICARIVS FILII DEI, ug pag-drawing og usa ka linya, nga may mga numerong Romano; ang “V” para sa lima, ug “I” para sa usa. . .

Ug kuwentaha kana, ug tan-awa kung dili ba ninyo makuha ang unom ka gatus ug kan-uman ug unom.

<sup>267</sup> Miingon ang Biblia, “Magalingkod siya sa templo sa Dios, og pagasimbahon nga sama sa Dios.” Sa diha nga nagpakatawo na kanang diyutay’ng doktrina, mamahimo kining usa ka bikaryo, “Salili sa Anak sa Dios.” Kita n’yo? Oh, grabe! Makuya gyud kana, og malimbongon nga espiritu! Kung gusto ninyong basahon kana, basaha sa Ikaduhang Mga Taga-Tesalonica 2:3, ug inyong makita kon asa kana.

<sup>268</sup> Ug, siyempre, mahinumduman ’sab ninyo nga si Satanas mao’y pangulo sa tanang pulitikanhong gahum, sa matag nasud. Pila man ang nasayod niana? [Nagaingon ang kongregasyon, “Amen.”—Ed.] Gusto n’yo bang isulat kana? Mateo 4:8, “Gidala ni Satanas si Jesus sa usa ka bukid nga hataas, uge gipakita niya Kaniya ang tanan nga gingharian sa kalibutan, nga naglungtad na o magalungtad pa, sa usa ka gutlo sa panahon.” Kuyawang tawhana! Ingon niya, “Thatag ko ang mga niini Kanimo, kung Imo akong simbahon.” Ug nasayod si Jesus nga Iya man sa gihapon pagapanundon ang mga niini.

<sup>269</sup> Mao kana ang ginaingon nila, “Aba, kamong pundok sa mga kabus nga mga holy-roller!”

<sup>270</sup> Aba, maangkon baya nato ang kalibutan! “Ang mga maaghop magapanunod sa yuta.” Mao kana’y giingon ni Jesus. Kita n’yo? Kita n’yo?

<sup>271</sup> Matikdi, nasayod na si Jesus nga pagapanundon Niya ang mga niini, busa miingon Siya, “Pahawa ka, Satanas. Nahisulat na,” nagabalik na usab sa Kasulatan, nakita n’yo, “Simbahon mo ang Ginoo, ug Siya lamang.” Kita n’yo?

<sup>272</sup> Karon—karon sa dihang—sa dihang siya, ingon nga mao’y pangulong demonyo, pagnagpakatawo na siya sa niining super ka, relihiyoso nga tawo, sumala sa gikatagna na sa Biblia, nan hiusahon na niya ang iyang iglesia ug ang gobyerno. Magkauban nga hiusahon na ang maong duruha sa iyang mga gahum. Kita n’yo?

<sup>273</sup> Sa diha nga migula ang anticristo nga espiritu, usa kini ka espiritu. Dayon nahimo kining unsa? Dayon nahimo kining. . . Karon matikdi kini nga Selyo. Sa diha nga migula ang maong espiritu, ang anticristo kini, nga batok sa pagtulon-an ni Cristo. Oo. Ang sunod nga butang nga gibuhat. . . Ang gisugo sa Dios para sa Iyang Iglesia nga pagabuhaton, mao’y batokan Niini ang kasal-anan. “Oh, dili kana ang buut ipasabot Niini. Dili kana ang buut ipasabot niana. Para man kana sa ubang tawo. Nga, nga usa ka gatus na ka tuig ang milabay, sa kaniadto pa man kana. Kana, dili man kana para kanamo.” Kita n’yo? Ang ingon-niana, kita n’yo, *anti*, “batok.” Dayon nahimo kining. . .

<sup>274</sup> Karon, migula ang mangangabayo, siya—wala siya’y unsa man nga korona, apan gihatagan siya og usa. Kanang puti nga

kabayo; aduna siya'y usa ka pana, pero walay mga udyong. Kita n'yo? Busa pagkahuman nga migula siya . . .

<sup>275</sup> Dayon, wala magdugay, gihatagan na siya og usa ka korona, tungod kay dili man ka puedeng magbutang og korona sa ulo sa usa ka espiritu. Apan, sa diha nga, nagpakatawo kini nga espiritu diha sa ikaduhang buluhaton sa iyang—sa dispensasyon sa iyang pagka-misteryoso, sa ikaduhang buluhaton, nahimo na siyang usa ka gipurongpuronga'ng, mini nga propeta, sa pagpamuhat sa anticristo nga espiritu. Karon, makita nato siya dinha, karon. Karon nahimo siyang ingon-niana, pagkadawat niya niana. Dayon, siya, na, si Satanas na ang nagakontrolar sa mga gahum pang-pulitika sa kalibutan.

<sup>276</sup> Karon miabot siya sa punto hangtud naangkon niya ang gahum sa usa ka pangtibuok-kalibutan nga iglesia, nga aduna na'y pang-relihiyon nga gahum. Ug wala ba ninyo masabti, mga igsoon ko, nga sa . . . Sa dihang, mitungha kini nga nasud diha sa ika-13 nga kapitulo sa Pinadayag, midaku kining gamay'ng mananap ingon nga usa ka cordero. Ug nagkaaduna kini'y duha ka sungay, sibil ug pang-simbahan nga gahum, ug gibuhat niya usab ang mao gihapong butang nga gibuhat sa mapintas-nga-mananap nga nag-una kaniya.

<sup>277</sup> Talagsaon kini, ang Amerika numero trese, ug usa pud ka babaye. Talagsaon kini, og mitungha pa gyud kini sa ika-13 nga kapitulo sa Pinadayag. Nagsugod kita sa trese ka mga raya sa bandila, trese ka mga bitoon. Ang tanan “trese, trese, trese, trese,” og tanan na. Ang tanan “babaye, babaye, babaye,” og tanan na.

<sup>278</sup> Ug ang madangtan niini sa katapusan, (gisulti ko nang daan kini), nga pagakontrolon siya sa usa ka babaye. Hinumdumi, kana'y traynta na ka tuig ang milabay, nga gisulti ko kana. Ug—ug ang—ug ang pito ka butang nga akong gitagna, lima kanila ang nahitabo na. Ug aduna na sila'y tawo dinha mismo karon aron mapasulod kining bayhana. Ug gibotaran ninyo kana, tungod sa inyong pulitika dinha. Oo. Huh! Bueno.

<sup>279</sup> Daghan pa kaayo akong ipanulti, nga dili mo na halos mahisgotan kung unsa ang gustong hisgotan. Matikdi karon. Dili ko na kamo langanon apan kadiyut na lang, kay basin kinahanglan ko pang ipadayon kini ugma sa gabii.

<sup>280</sup> Tan-awa. Matikdi. Sa dihang si Satanas . . . Karon, ang tanan, kung ingon-ana, nasayod nga si Satanas ang nagakontrolar sa tanang gahum pang-pulitika sa kalibutan. [Nagaingon ang kongregasyon, “Amen.”—Ed.] Mao kana'y iyang giingon. Sa Mateo sa ika-4 nga kapitulo, basaha ninyo kini, ug ang ika-8 nga bersekulo. Ang tanang gingharian panag-iyang niya. Mao kana'y hinungdan nga nagaaway-away sila, nagkagubatay, og gapinatyanay. Karon hinumdumi.

281 Dili ba kana makatingala? Gihatagan sila niining espada, aron magpinatyanay sa usa'g usa. Oh, oh, oh, grabe! Matikdi karon.

282 Karon, sa dihang gibuhat niya kana, wala pa siya niadto og gahum pang-simbahan. Apan nagsugod siya pinaagi sa demonyo sa usa ka mini nga pagtulon-an. Ug kana nga pagtulon-an nahimong usa ka doktrina. Kana nga doktrina usab nagpakatawo diha sa usa ka mini nga propeta.

283 Ug pagkahuman niana miadto siya sa husto nga dapit. Wala siya miadto sa Israel, ha. Miadto siya sa Roma; Nicaea, Roma.

284 Gipahigayon didto ang konseho, ug nagpili sila og usa ka pangulong obispo. Ug pagkahuman, tungod niadto, nahiusa nila ang iglesia ug ang gobyerno. Dayon, gibuhian na niya ang iyang pana. Minaug siya sa iyang puti nga kabayo. Misakay na siya sa iyang pulang kabayo, tungod kay mahimo na man niyang patyon ang si kinsa man nga dili mouyon kaniya. Ingon niana ang maong Selyo. Mao gihapon nga tawo! Matikdi siya nga nagasakay paingon sa Eternidad, pinaagi niana, kita n'yo, nga gihiusa ang iyang duha ka gahum.

285 Mao sa gihapon ang ginapaningkamotan nilang buhaton karon, mao rang butang, sa karon. Ug pagkatalagsaon nga butang, tingali'g dili ninyo masabtan kini. Apan, karon lang adlawa, gikan sa usa ka grupo sa mga Baptist sa Louisville. . . Mapaminawan n'yo kini sa radyo. Usa ka mamumulong ang nagsibya ug. . . Pila man ang nakapaminaw niini? Husto. Kita n'yo? Bueno, mao kini. Gusto nila, ug naghangyo sa iglesia karon, nga, "Dili man gyud nato kinahanglan, oh, nga magpamiyembro gyud sa iglesiang Katoliko, kondili medyo kinahanglan lang natong magpakig-fellowship kanila." Nasabtan. . . Ug, sa mao rang higayon nga nagakahitabo kana sa Louisville, dinhing dapita usab ginapahayag sa Dios ang Mga Selyo ngadto sa Iyang katawhan, aron ipakita kini, "Ayaw buhata kana!" Nakita n'yo na silang duha nga dungan nga nagapamuhat? Hinumdumi, nga nagatugdon ang uwak ug salampati sa mao ra nga tugdonganan, sulod sa arka kaniadto. Oo. Timan-i gyud.

286 Karon hingsayran nato, nga gihiusa niya ang iyang gahum, pagkahuman, nga nahimo na siya nga mao ang gobyerno ug iglesia, ang simbahan. Kung ingon-ana unsa na'y buhaton mo? Nagtukod siya og kaugalingon niyang relihiyon. Ug karon mahimo niya ang bisan unsa man nga gusto niya. Dayon, aduna na siya'y katungod nga patyon ang si kinsa man nga dili mouyon kaniya. Eksaktong ingon niana ang iyang gibuhat, usab. Ug gibuhat niya kana sa ingon ka eksakto gayud. Ug unsay iyang-iyang. . . Gibuhat niya kana sa tinuod nga mga balaan sa buhi nga Dios, nga nagbantay gyud sa Pulong ug wala miuyon kaniya sa iyang mga dogma. Mao nga gipamatay niya sila.

287 Karon, Igsoong Lee Vayle, ug kamong mga magtutudlo dinhi mahitungod sa kapanahonan sa Nicaea ug sa nahaunang iglesia, wala ko mahibalo kon nabasa n'yo na ba kini o wala. Kung gusto n'yong basahon kini, palit mo og *Glorious Reformation* ni Schmucker.

288 Ug mahibaloan ninyo, nga, sa dihang si San Augustine nga taga-Hippo nahimong usa ka pari ilalum sa iglesiang Romano, nagkaaduna siya unta og oportunidad, nga usa ka higayon kaniadto misulay ang Balaang Espiritu nga mokunsad kaniya, pero gisalikway niya Kini. Pila man ang nakahibalo niana, ingon nga usa ka magtutudlo? Busa, gisalikway niya ang Balaang Espiritu. Eksaktong ingon-ana, nga matang ang iglesiang Protestante sa karon, pag-isalikway ang Espiritu Santo. Mibalik siya ngadto sa Hippo, ug siya kadto ang mismong mipirma, niadtong papel nga nagapahayag, “Ang kapadayagan nga gikan sa Dios, nga okey lang ug makapahimuot ra sa Dios, nga patyon ang tanang tawo nga dili motoo sa iglesiang Romano Katoliko.”

289 Karon paminaw. Ginakutlo ko lang kini gikan sa listahan sa mga martir nga, “Sukad niadtong panahon ni—ni San Augustine nga taga-Hippo, hangtud 1586,” diha sa Romanong listahan sa mga martir, “ang iglesiang Romano Katoliko nagpamatay og saysenta’y-otso ka milyon ka mga Protestante.” Mapula ba ang iyang espada? Nagasakay ba siya sa usa ka pulang kabayo? Unsa man kadto? Mao ra nga gahum; mao ra nga mangangabayo. Tan-awa ang mao nga Selyo. Giangkong mismo nila, “saysenta’y-otso ka milyon,” diha sa listahan sa mga martir, wala pa’y labot ang tanang gipamatay gawas niana. Oh, kalooy! Sa panahon sa mangiub nga kapanahonan, aduna usab og minilyon nga gipakaon ngadto sa mga leon, ug gipamatay sa tanan na lang nga paagi, tungod kay wala man sila miyukbo nianang Katoliko nga dogma. Kabalo na mo niana.

290 Unsa pa ba ka taas ang inyong oras? [Nagaingon ang kongregasyon, “Daghan pa’y oras. Bisan pa’g tibuok gabii.”—Ed.] Sige. Tugoti kong basahon ang usa ka butang. Dungan natong ablihan karon, aduna ko’y ipakita kaninyo. Atong—atong ihulagway kini nga butang, sa makadiyut. Nahitabo lang nga nadumduman ko kini, ug basahon sa nato kini. Ablihan nato sa Pinadayag, sa ika-17 nga kapitulo sa Pinadayag. Aduna pa man ta’y kinse minutos nga nahibilin. Sige. Karon paminaw gyud, og ayo karon, samtang magabasa kita. Kamo nga adunay mga Biblia ug mga nag-abli, hatagan ko lang kamo og diyutay’ng oras, aron makuha ninyo kini.

291 Nakuha mo ba kana, Lee? Sa kang Schmucker ko kini nakuha, kita n’yo, *Glorious Reform*, nga kinuha pud gikan sa listahan sa mga martir sa Roma, didto sa Vatican.

292 Karon, kana'y hangtud pa sa pagpanglutos sa mga sumusunod ni San Patrick. Ug pagkahuman gitawag pa nila si San Patrick nga ilang—ila konong santo. Huh! Si San Patrick halos kapareho ko lang nga Katoliko; ug kabalo na mo kung unsa gayud ako ka katoliko. Kita n'yo? Siya—gikasilagan niya ang doktrina sa maong iglesia. Mibalibad siya nga moduaw sa papa. Oo, sir. Si San Patrick pa gani. . . Aba, kamo, nakaadto na ba mo sa Amihanang Ireland, kon diin atua ang iyang gitukod nga mga eskwelahan? Kabalo mo, dili man Patrick ang iyang ngalan. Pila man ang nakahibalo niana? Sucat ang iyang ngalan. Husto kana. Nawala ang manghud niyang babaye. Mahinumduman pa ba ninyo sa dihang sila. . . Kita n'yo? Sige.

293 Karon matikdi, ika-17 nga kapitulo sa Pinadayag. Karon ang tanan paningkamoti gayud nga ablihan ang inyong kasingkasing. Tugoti ang Balaang Espiritu nga tudloan kamo karon.

. . . *miabot kanako ang usa sa pito ka mga manulonda nga may—nga may pito ka mga panaksan, . . .*

294 Karon, nakita n'yo, adunay Pito ka Mga Panaksan. Nahibalo na mo, niining mga tinag-pito, diha sa atong paghisgot niini, mahitabo ang tanan niini sa mao ra nga higayon; nga sama sa Mga Hampak, sama sa mga kapanahonan sa iglesia, parehong silang tag-pito, tungod kay ang tanan niini selyado man sulod nianang usa ka Basahon, ang tanan-tanan. Ug ang tanan sunod-sunod nga nagakahitabo; ang usa nagasunod sa usa, ug sundan kini sa usa pa, ug sundan kini sa usa na usab. Adunay duha ka espiritu nga nagapamuhat; ang Dios, ug ang yawa. Kita n'yo?

. . . *nga may pito ka kaulahiing mga panaksan, ug nakigsulti siya kanako, nga nagaingon . . . Umari ka; ug ipakita ko kanimo . . . kanimo ang hukom sa bantugang dautan nga babaye nga nagalingkod sa ibabaw sa daghang mga tubig:*

295 Karon tan-awa dinhi, dinhi dapit, kanang, “mga tubig.”

296 “Dautang-babaye,” unsa man kana? Usa kana ka babaye. Dili mahimo nga usa ka lalaki. Ug unsa ma'y ginasimbolo sa babaye diha sa iglesia, diha sa Biblia? Iglesia. Ngano man? Pangasaw-onon man ni Cristo, ug unsa pa man; nakita n'yo, babaye kini, ang iglesia.

297 Karon, “mga tubig,” unsa ma'y ginapasabot niana? Matikdi dinhi. Basaha dinha ang ika-15 nga bersekulo niini.

*Ug siya miingon kanako, Ang imong nakita nga mga tubig, diin nagalingkod ang dautang babaye, mao ang mga tawo, . . . mga panon, . . . mga kanasuran, ug mga pinulongan.*

298 Kini nga iglesia nagahari sa tibuok kalibutan, kita n'yo, “Nagalingkod ibabaw sa daghang mga tubig.”

*Nga kaniya nagpakighilawas ang mga hari sa yuta, espirituhanong mga pagpanapaw (ginadawat ang iyang doktrina, doktrinang Nicolaita), ug ang mga nagapuyo sa yuta nangahubog sa vino sa iyang pagpakighilawas.*

299 Aba, wala na gyu'y mas molabaw pa nga pundok sa mga hubog, kay niana! Ikaw. . .

*Ug iya akong gidala diha sa espiritu ngadto sa kamingawan: ug nakita ko ang usa ka babaye. . .*

300 Ug kahibalo ba mo kung unsa? Ang mismong sinulat sa Katoliko nagaangkon nga ang ilang iglesia kini. Pila ba ang nasayod niana? Diha mismo sa kaugalingon nilang sinulat. Aduna ko'y libro sa *Facts Of Our Faith*, mao'y titulo niini, karon; kita n'yo; nga panag-iya sa usa ka pari. Okey. Sige.

*Ug iya akong gidala diha sa espiritu ngadto sa kamingawan: ug nakita ko ang usa ka babaye nga nagasakay sa usa ka mapulang mapintas nga mananap nga sinul-oban, nga nalukop sa mga ngalan nga masipad-anon, nga may pito ka mga ulo ug napulo ka mga sungay.*

301 Karon matikdi lang kana, kana nga simbolo, kanang “pito ka mga ulo.” Karon nakita n'yo dinhi kon diin giingon Kini, “Ug ang—ug ang—ug ang. . . Ang mga ulo nga imong nakita mao ang pito ka bungtod nga gilingkoran sa babaye.” Nagalingkod man ang Roma sa pito ka bungtod. Kita n'yo? Karon wala gyud kana nasayup, kita n'yo, “Pito ka mga ulo.” “Ug napulo ka mga sungay,” kabalo na mo, nga mao ang napulo ka gingharian, ug uban pa.

*Ug ang babaye nagbistig purpura. . . escarlata, . . . nadayan-dayanan sa bulawan ug mga batong hamili. . . mga mutya, may copa nga bulawan sa iyang kamot nga puno sa kangil-ad—kangil-ad sa kahugawan sa iyang pagpakighilawas:*

302 Kanang anticristo nga espiritu, “pagpanapaw,” kita n'yo, “pagpanudlo,” nga nagahimo og pagpanapaw batok sa Dios. Kita n'yo? Karon, siya ang maong Pangasaw-onon unta, kita n'yo; ug nagpanapaw. Kita n'yo? Sama ra sa gibuhath ni Eva kaniadto, sama ra sa gibuhath sa iglesia dinha. Kita n'yo?

*Ug diha sa iyang ulo nahisulat, nahisulat ang usa ka ngalan, TINAGO, BABILONIA NGA BANTUGAN, . . .*

303 Ug nasayod ang si kinsa man nga ang, “BABILONIA” mao ang Roma.

*. . . ANG INAHAN SA MGA BIGAON UG SA MGA KANGIL-ARAN SA YUTA.*

304 Ug paminawa ang ika-6 nga bersekulo.



*Ug nakita ko ang babaye nga nahubog sa dugo sa mga balaan, ug sa dugo sa mga gipamatay nga mga saksi ni Jesus: ug sa nakita ko siya, nahibulong ako'g daku.*

305 Siya'y usa ka matahum kaayo nga butang, nga may mga krus ug tanan na diha kaniya! “Unsaon man niya pagkasad-an sa pag-inom sa dugo sa mga balaan?” Nakapalibog gyud kana kaniya. Karon sultihan na Niya siya.

*Ug ang manulonda miingon kanako, Nganong nahibulong ka man? Itug-an ko kanimo ang tinago sa babaye, ug . . . sa mapintas nga mananap nga nagdala kaniya, . . .*

306 Karon, dili na kini ilalum sa usa sa Mga Selyo. Lahi na kini nga butang, kita n'yo.

*Ug miingon siya . . . ang pito ka mga ulo ug ang napulo ka mga sungay.*

*Ang mapintas nga mananap . . . nga imong nakita mao ang sa kaniadto, ug dili ang sa karon; ug mao ang molugwa gikan sa bung-aw sa kahiladman nga walay kinutoban (o walay sangyad, ang papa kini), ug mopadulong sa pagkalaglag: ug ang mga nanagpuyo sa yuta manghibulong sila, kinsang mga ngalan wala mahisulat sa basahon sa kinabuhi sa Cordero, (sila kanang mga Pinili, kita n'yo), sa kinabuhi sukad sa pagkatukod sa kalibutan, . . .*

307 Giunsa, og kanus-a man nahisulat ang imong ngalan sa Basahon sa Kinabuhi? Sa rebaybal ba nga imong gitambongan? Dili, sir. “Sukad pa sa pagkatukod sa kalibutan.”

*. . . sa pagkakita nila sa mapintas nga mananap nga mao ang sa kaniadto, . . . dili mao ang sa karon, ug mao ang sa umalabot.*

308 Kita n'yo, “ang mapintas-nga-mananap,” mamatay man ang usa, ug ang usa na usab ang mopuli kaniya. “Siya mao ang sa kaniadto; dili siya mao ang sa karon. Siya mao ang sa kaniadto; dili siya mao ang sa karon. Mao ang sa kaniadto; dili siya mao ang sa karon.” Ug siya'y mopadayon hangtud sa pagkalaglag, nga ingon niana. Kita n'yo? Bueno.

*Ug ania—ug ania ang salabutan nga may kaalam.*

309 Pila man ang nasayod nga adunay siyam ka espirituhanon nga mga gasa, ug ang usa niini mao ang kaalam? [Nagaingon ang kongregasyon, “Amen.”—Ed.] Okey.

*Ang pito ka ulo mao ang pito ka mga bungtod, nga niini nagalingkod ang babaye.*

310 Oh, ikaw'y bug-os gayud nga buta, bungol ug amang, pag-dili ka makasabot niana. Kita n'yo? Bueno.

*. . . sila mao ang pito ka mga hari: ang lima kanila nangapukan na, ug ang usa mao siya karon (si Nero), ug . . . ang usa wala pa mahiabot; ug sa mahiabot na siya, kinahanglan magapabilin lamang siyang makadiyut.*

311 Nahinumduman man ninyo siguro kung unsay iyang gibuhat. Gisunog niya ang siyudad, ug gipasangil kadto sa mga Cristohanon. Ug iyang gihigot ang iyang inahan sa gansong sa kabayo ug gipaguyod kadto sa kadalanan. Ug nag-bayolin pa, samtang nagakasunog na ang Roma. Oo.

*Ug ang mapintas nga mananap nga mao ang sa kaniadto, ug dili ang sa karon, kini siya mao ang ikawalo, . . .*

312 Paganong Roma, nga nahimong papanhong Roma. Sa diha nga ang nagpakatawong anticristo nga espiritu nahimo nang tawo, ug gipurong-purongan, gihimo siyang hari sa Roma nga gipurong-purongan, sa gobyerno ug sa iglesia, nga dungan. Oh, igsoon! Kita n'yo, pagkapuno gyud niini. Kita n'yo?

*. . . mao . . . ang ikapito, ug mopadulong siya . . . (Unsa ba ka dugay siyang molungtad? Wala nila sukad giusab ang maong sistema.) . . . ngadto sa pagkalaglag.*

*. . . ang napulo ka sungay nga imong nakita mao ang napulo ka mga hari, nga wala pa managpakadawat ug mga gingharian nga iya sa hari; apan ilang pagadawaton ang pagbulot-an ingon nga mga hari sulod sa usa ka takna kauban sa mapintas nga mananap.*

313 Mga diktador kana, nakita n'yo, siyempre. "Kini sila usa ra'g hunahuna." Karon, tan-aw mo dinhi. Ug naghisgot-hisgot sila mahitungod sa komunismo. Kita n'yo?

*Kini sila usa ra'g hunahuna, ug ngadto sa mapintas nga mananap igatugyan nila ang ilang kagahum ug pagbulot-an.*

*Sila magapakiggubat batok sa Cordero, apan pagadag-on sila sa Cordero: kay kini siya mao man ang Ginoo sa mga ginoo, ug Hari sa mga hari: ug sila nga uban kaniya mao'y mga tinawag, . . . mga pinili, ug mga kasaligan.*

*Ug siya miingon kanako, Ang mga tubig nga imong nakita, diin nagalingkod ang dautang babaye, mao ang mga tawo, . . . mga panon, . . . mga kanasuran, ug mga pinulongan.*

*. . . ang napulo ka sungay nga imong nakita ug ang mapintas nga mananap, kini sila managdumot sa dautang babaye, ug mabungkag kana nga kasabutan . . . (Nahisgotan ko na kini kagabii.) . . . ug siya ilang pagalaglagon ug pagahuboan, ug ang iyang unod*

*ilang pagakan-on, ug siya ilang pagasunogon pinaagi'g kalayo.*

314 Wala ba mo mahibalo nga miingon ang Biblia nga ang mga kapitan sa barko, ug ang tanang uban pa, miingon, “Alaut, alaut, ang bantugang siyudad! Daw sa unsa nga natagbo gyud niini ang kaalautan sulod sa usa ra ka oras!” Kita n’yo?

*Kay diha sa ilang mga kasingkasing gibutang sa Dios ang pagbuhat sa iyang kabubut-on, ug ang pag-usa sa usa ka tuyo, ug ang paghatag sa ilang mga gingharian ngadto sa mapintas nga mananap, hangtud nga matuman ang pulong sa Dios.*

*. . . ang babaye nga imong nakita mao ang bantugang siyudad, nga nagahari sa tanang mga hari sa yuta.*

315 Sultihí ako og usa. Dili ang Rusya ang nagahari sa tanan. Dili pud kita ang nagahari sa tanan. Aduna lamang og usa ka hari ang nagahari sa tanang. . . sama nianang puthaw ni Nabucodonosor nga nagkasagol sa matag usa niadtong mga tudlo sa tiil. Ang Roma kana. Dili nagahari ang Roma ingon nga usa ka nasud; nagahari kini ingon nga usa ka iglesia. Ang matag nasud sa ilalum sa langit mao’y iya sa Roma.

316 Dili ikatingala nga miingon sila, “Kinsa’y arang makapakiggubat kaniya?” Puede siyang moingon, “Kalinaw,” [Ginapalagitik ni Igoong Branham ang iyang tudlo sa makausa—Ed.] mosunod dayon ang tanan. Pag moingon ang tanang Katoliko, “Ingon-niini, ‘Ayaw pagpakig-away,’” ug—ug dili gyud sila mopakig-away. Kana lang. “Kinsa ba’y arang makabuhat sa iyang ginabuhat?” Walay si bisan kinsa. Husto kana. “Busa nangahibulong sila sa mga milagro nga mahimo niya.” Mahimo niyang magpahunong og gubat. [Ginapalagitik ni Igoong Branham ang iyang tudlo sa makausa.] Ang bugtong butang lang nga kinahanglan niyang buhaton mao ang pag-ingon, “Hunong.” Kana lang. Apan sa hunahuna n’yo ba buhaton niya kana? Siguradong dili gyud.

317 Matikdi, siguradong ginapakita gyud niana, “Kinahanglang magpinatyanay sila sa usa’g usa. Kinahanglan nga patyon nila ang usa’g usa.” Ang iyang pana walay mga udyong, sa primero, apan ang iyang “dakung espada” mao’y mihimo. Gibuhat niya ang iyang mga pagpamatay, sa ulahi na, ug mibalhin gikan sa puti nga kabayo ngadto sa pula nga kabayo; eksaktong, mao ra gihapon, nga yawa, nga gamit na ang iyang espada.

318 Unsa ma’y giingon ni Jesus? Miingon si Jesus, “Sila nga magagamit og espada mangamatay sa espada.” Ayaw gyud pagbalus. Kita n’yo? Si Jesus, niadtong gabhiona nga nagsulti Siya, nga gisulti kana, ug nagamit gyud ni Pedro ang iyang espada. Kita n’yo? Buhata lang ang sama sa gibuhat ni Jesus, og magpadayon lang.

<sup>319</sup> Karon, karon hinumdumi, nga aduna siya’y usa ka espada. Motungha siya, nga may usa ka espada diha sa iyang kamot; nagasakay, sa pula nga kabayo, nga nagaubog sa dugo sa tanang tawo nga wala-miuyon kaniya.

<sup>320</sup> Karon nasabtan ba ninyo kini? [Nagaingon ang kongregasyon, “Amen.”—Ed.] Pila man ang nakasabot karon kung unsa gyud kini nga Selyo? [“Amen.”] Okey. Karon, unsa ma’y giingon ni Jesus? “Sila nga magagamit og espada mangamatay pinaagi sa espada.” Husto ba kana? Husto. Husto. Kini nga mangangabayo ug ang tanang ginsakupan sa iyang gingharian nga nanagpamatay sa tibuok niadtong nangaging mga kapanahonan, nga nagpabanaw sa tanan niadtong dugo sa mga martir nga mga balaan, pagapatyon usab pinaagi sa Espada ni Jesus Cristo pagmoabot na Siya. “Sila nga magagamit og espada pagapatyon usab pinaagi sa espada.” Gigamit nila ang espada sa dogma ug anticristo, ug gipamatay ang matuod, og tinuod nga mga magsisimba, sa tanang nangaging mga kapanahonan, kaniadto, nga miabot, og minilyon. Ug pagmoabot na si Cristo nga may dala’g Espada, tungod kay Iya man kining Pulong nga nagagula gikan sa Iyang baba, pagapatyon Niya ang tanang kaaway nga anaa sa atubangan Niya. Nagatoo ba mo niini? “Patyon ang kaaway.”

<sup>321</sup> Moadto ’usa ta dinhi sa makadiyut lang, Pinadayag. Atong tan-awon karon kung ginasulti ko lang ba kana, o kung ginasulti ba kaha kana sa Pulong. Pinadayag 19:11.

*Ug nakita ko nga naablihan ang langit (amen), ug ania karon ang usa ka kabayo nga maputi; ug siya nga nagakabayo niini ginganla’g Kasaligan ug Matuod, ug sa pagkamatarung siya nagapanghukom ug nagapakiggubat.*

*Ang iyang mga mata . . . mga siga sa kalayo, ug sa iyang ulo . . . daghang mga purongpurong; . . .*

<sup>322</sup> Oh, igsoon! Kita n’yo, Siya’y human nang gipurongpurongan sa Iyang mga balaan, nakita n’yo.

*. . . ug siya adunay sinulat nga ngalan, nga walay bisan kinsa nga nasayod, gawas sa . . . iyang kaugalingon.*

<sup>323</sup> Hinumdumi, kita—dili nato mahimo, wala kita nasayod niana, kita n’yo, kung unsa kana. “Ug siya’y sinul-oban. . .” Atong tan-awon.

*Ug siya sinul-oban og bistì nga gikatuslob sa dugo: ug ang iyang ngalan gitawag (dili nga “pagatawgon,” kondili “gitawag”) Ang Pulong sa Dios.*

<sup>324</sup> Kay, Siya ug ang Pulong usa ra. Kita n’yo? karon matikdi, dili nga “Ang Iyang mga ngalan.” Uh-huh! “Ang Iyang ngalan gitawag og ‘Pulong sa Dios.’” Usa lamang ka Ngalan ang naila niini; wala na’y ubang ngalan.

*Ug ang mga kasundalohan sa langit, nga anaa sa langit nagasunod kaniya nga nanagkabayo sa mga kabayo nga maputi, nga sinul-oban sa lino nga manipis, maputi ug mahinlo. (Kana mao ang pagkamatarung sa mga balaan. Kita n'yo?)*

325 Karon matikdi. Unsa ma'y giingon ni Jesus? "Siya nga nagagamit og espada . . ." Bueno, ang mangangabayo sa pulang-kabayo, ania kon asa iyang paingnan. "Siya nga nagagamit og espada . . ." Mahimong nakapatay ka man og saysenta'y-otso ka milyon kanila, sa tanan niadtong nangaging mga kapanahonan, nga sukad pa kaniadto; tingali'g mas daghan pa gani. Apan ang ingon ni Jesus, "Siya nga nagagamit og espada mamatay pinaagi niini." Matikdi.

*Ug gikan sa iyang baba nagagula ang usa ka mahait nga espada, . . .*

326 Mga Hebreohanon, sa ika-4 nga kapitulo, miingon, "Ang Pulong sa Dios labi pang mahait kay sa espada nga duhay-sulab, nga nagadulot bisan sa kinauyokan sa bukog." Ug unsa ma'y ginabuhat Niini, ang ginabuhat, sa Pulong? "Kini'y usa ka Magtutugkad sa mga hunahuna sa kasingkasing." Husto.

*. . . gikan sa iyang baba nagagula ang usa ka mahait duhay-sulab . . . usa ka mahait nga espada, aron pinaagi niini panigbason niya ang mga kanasuran: ug sila pagaharian niya sa olisi nga puthaw: ug siya nagagiuk sa pug-anan sa vino sa mabangis nga kapungot sa Dios nga Makagagahum-sa-tanan.*

*Ug sa iyang bisti ug sa iyang dapidapi nahasulat kini nga ngalan, HARI SA MGA HARI, UG GINOO SA MGA GINOO.*

327 Ingon nga mga impostor, batok sa Pulong sa Dios, ug tungod nga dili man sila mouyon, ug kining butang . . . gipahimutang ni Satanas, og gihiusa ang mga pulitikanhong gahum nga naangkon niya, ug ang mga espirituhanong gahum nga naangkon niya, ang tanan-tanan niini, ug nagtukod siya og usa ka iglesia nga mikaylap sa tanang nasud. Ug gipahimutang niya ang minilyon ka minilyon ka pilo . . . human nga mikanaug siya gikan sa puti nga kabayo, paingon sa iyang pula nga kabayo, ug gidala ang iyang espada ug miadto na.

328 Apan miingon ang Dios, "Ang mao mismong Butang nga iyang gituis, o gipaningkamotang tuison, pinaagi sa usa ka mini nga pagtulon-an; ang mao mismong Pulong motungha diha sa gahum, nga nagagula gikan sa mga ngabil ni Jesus Cristo, ug pagapatyon siya, ug ang tanan-tanan sa Iyang atubangan." Amen.

329 Mao kana ang Ikaduhang Selyo. Gihigugma n'yo ba Siya? [Nagaingon ang kongregasyon, "Amen."—Ed.] Oh, pagkamaanindot! Kana'y MAO KINI ANG GINAINGON

SA GINOO. [Nagakalipay sa hilabihan ang kongregasyon.] Dalaygon ang Dios! Ang tanan niining uban pang mga kapadayagan, ug mga panan-awon, ug tanan na, eksaktong mitakdo gayud sa—sa maong punto! Ug pila man ang nasayod niana? Ipataas ang inyong kamot. Gatasan, ang tanan nga ania dinhi, nagpataas sa ilang mga kamot. Husto kana. Mamatuman gyud Kini! Timan-i, mamatuman gayud. Oh, higala!

Pagduol ngadto sa Tuburan nga puno sa Dugo,  
 Nga gikan sa mga kaugatan ni Immanuel;  
 Diin ang mga makasasala nga nanglusbog sa  
 maong baha,  
 Mangatangtang ang tanan nilang mga lama sa  
 sala.

<sup>330</sup> Duol mo, og toohi Siya, kung wala pa gyud mo nakaduol sukad. Ayaw pagpanalagma; ayaw, ayaw, kung aduna pa'y bisan unsa dinha sa inyong kinabuhi, higala.

<sup>331</sup> Ania na kita. Adunay butang nga andam nang mahitabo. [Ginadukdok ni Igsoong Branham ang pulpito sa makaupat ka higayon—Ed.] Wala ko mahibalo kon ngano. Wala ko mahibalo kung kanus-a. Nasayod ako sa kung unsay mahitabo, apan wala ako mahibalo kung kanus-a man kini mahitabo. Apan mahitabo gyud kini, tungod kay ginapadayag Niya kini karon mismo. Dili Siya nagabuhat og unsa man gawas kon gipadayag na Niya kini. Amos 3. Ginapadayag Niya kini, una. Ug gisaad Niya nga mahitabo gyud kini nga mga butang sa kaulahiang mga adlaw. Ug sa ikapitong kapanahonan sa iglesia, sa katapusan niini, pagmiabot na ang maong mensahero, dinha kini magakahitabo. Igapadayag gyud kini, igapadayag na kanang gipangbadbad na nga Mga Selyo, ug ania na Kini. Karon, kana'y sa Ngalan sa Ginoo. Toohi Kini, higala. Oo, sir. Panggawas na mo sa Babilonia!

<sup>332</sup> Aduna ko'y gustong isulti sa dili pa ang pagtapos. Tungod, aduna na lang ko'y. . . Matapos na ko sa alas nuebe-traynta. Eksaktong oras na gyud karon.

<sup>333</sup> Ako ug si Billy, sa pagnaug namo gikan sa eroplano, didto sa India, sa among kaulahiang biyahe didto. Nagbasa ako sa usa—usa ka mantalaan nga ilang gidala, gisulat kadto nga Iningles. Ug ang ingon niini, “Siguradong human na ang linog; nagapamalik na man ang mga langgam.” Dayon naghatag kini og mga detalye. Sila. . . Aduna gyu'y kataw-anan nga nahitabo.

<sup>334</sup> Sa India wala sila didto og alambre nga mga koral nga sama sa ato. Manguha ra sila og mga bato, ug himoon nilang mga koral. Ug ginatukod nila ang kadaghanan sa ilang mga balay gikan sa mga bato, ginapatong-patong lang ang mga niini didto. Ug mainit didto, ang palibot, oh, sa bisan asa, halos sa tibuok, India, gawas lang kon atua ka ibabaw sa mga bukid. Ug sa tibuok

Calcutta ug tanan na, manghigda ra ang mga tawo sa kadalanan, nga naghimalatyon na sa kagutom, ug uban pa.

<sup>335</sup> Karon, busa, ug ginatukod nila ang ilang mga balay sa mga tore, ang ilang kabalayan. Palibotan nila kini og—og koral hangtud ingon—ani kataas, sa kilid sa ilang balay. Magtukod sila og tore para sa ilang balay, ug sa tore mismo mahimong didto nila gikalot ang ilang atabay. Gikalot nila kadto para sa ilang kabakahan ug uban pa, dayon gilukop og koral ang palibot.

<sup>336</sup> Ug, sa kalit lang, adunay hinay-hinay nga nahitabo. Ang gagmay'ng mga langgam, kabalo mo, nga nagatugdon niadtong mga bato, ug dinha sila nagahimo sa ilang mga salag ug dinha nila ginapadaku ang ilang mga piso. Ug may usa ka butang nga hinay-hinay nga nahitabo.

<sup>337</sup> Matag adlaw, pag moinit na, mag-alirong ang tanang mga baka ug magpasilong sa landong niadtong mga paril; aron mabugnawan.

<sup>338</sup> Ug dinha nga mga dapit nanagpuyo ang tanang gagmay'ng mga langgam. Ug, sa kalit lang, ang tanan niadtong gagmay'ng mga langgam, sa usa ka wala-masayri nga hinungdan. . . Karon, kabalo na mo kung unsay atong gihisgotan niadtong miaging adlaw mahitungod sa gagmay'ng mga langgam. Kita n'yo? Sa usa ka wala-masayri nga hinungdan, nanglupad silang tanan palayo. Ug nanghawa sila, ug wala na namalik sa ilang mga salag. Nangadto sila didto sa umahan, ug nanagtugdon sila sa mga punoan, ug sa kung asa man sila makatugdon, o kaha sa yuta ra mismo.

<sup>339</sup> Wala na nag-alirong ang mga baka. Wala na 'sab nag-alirong ang mga karnero. Nagpabilin ra sila didto mismo sa umahan, ug ningsandig ra sa usa'g usa. Usa kadto ka maayong paagi nga buhaton. Nasayod sila nga aduna gayu'y mahitabo.

<sup>340</sup> Dayon, sa kalit lang, nahitabo ang linog, nga nagpahugno sa mga paril, nagpahugno sa mga koral, ug tanang uban pa.

<sup>341</sup> Pagkahuman niadto hinay-hinay nang namalik ang gagmay'ng mga langgam. Wala gyud sila mibalik sulod sa tulo o upat ka adlaw; pagkahuman na lang niana nga hinay-hinay silang namalik. Ingon sila, "Bueno, siguradong human na gyud ang linog; namalik na man ang mga langgam."

<sup>342</sup> Ngano man? Dili ba mo motoo nga ang mao ra nga Dios nga nagpalihok niadtong mga langgam ug mga baka ug mga karnero, sa mga adlaw ni Noe kaniadto, nga mosulod sa arka, Siya ang mao sa gihapon nga Dios nga makahimo sa pagpalupad kanila ngadto sa kahilwasan? Husto ba kana? [Nagaingon ang kongregasyon, "Amen."—Ed.]

<sup>343</sup> Karon tugoti kong isulti ang usa ka butang, igsoon. Adunay butang nga andam nang mahitabo. Ug kining tanang dagkung, karaan na nga mga paril pang-simbahan mangahugno gayud, ug

mamalik gyud sila didto, ug magkauyonay. Tungod kay, buhaton gyud nila kana, sa ingon ka sigurado nga nagatindog ako dinhi. Aduna na'y "usa ka larawan kanang mapintas-nga-mananap," sa ingon ka sigurado gayud nga nagatindog ako dinhi; ug gidawat na kana sa niining nasud, sumala sa Pulong sa Ginoo. Paminaw, pagmabati ninyo kanang medyo, dili-masabtan nga pagbati, pahilayo na mo niana nga mga paril. Pahilayo na! Mangamatay gyud kamo dinha. Ayaw na paglangay! Panggawas na mo gikan niana! Pahilayo na mo gikan sa tanan nianang mga butang! Pangalagiw na kamo paingon sa kaluwasan, sa ingon ka paspas nga mahimo ninyo. Pangamuyo sa Dios aron kaloy-an kamo.

<sup>344</sup> Ayaw nga basta na lang, og, "Bueno, ang akong inahan usa man ka Methodist, busa angay lang nga ingon-ana 'sab ako. Ang akong papa Baptist man; angay lang nga ako pud." Ayaw ninyo buhata kana. Ayaw mo—ayaw gyud mo pagpamasin.

<sup>345</sup> Dili ko igsapayan kung unsa man Kini ka yano ug ubos; Kini mao ang Pulong sa Ginoo. Pangalagiw na mo paingon kang Jesus Cristo sa ingon ka paspas gayud nga mahimo ninyo, ug magpabilin dinha hangtud nga pun-on kamo sa Dios sa Iyang Balaang Espiritu. Kay moabot ang takna nga mangita kamo Niini, ug wala na Kini nianang panahona. Busa, siguradoha ninyo nga buhaton kana.

Iduko nato ang atong mga ulo, sa makadiyut.

<sup>346</sup> Langitnong Amahan, oh, ako—ako gyud, usahay, Ginoo, pagmotindog ko dinhi ug—ug mangurog ako. Mahunahuna ko kanang makalilisang nga takna nga nagsingabot na, ug ako. . . Wala na gayu'y paagi nga mapugngan pa kini. Gikatagna na nga moabot kini. Ug nakahunahuna ko nga, "Nganong dili pa man mangduol ang mga tawo ug—ug—ug maminaw? Ug dili na ba gyud kaha sila mangduol ug modawat Niini?" Apan, siyempre, nasayod ko nga—nga Imong—nga Imo nang gisulti nga ayaw gyud nila, busa dili gyud sila mangduol.

<sup>347</sup> Apan aduna usab og pipila nga ang ilang mga ngalan nahisulat na sa Basahon sa Kinabuhi sa Cordero. Ug sa diha nga giablihan na kanang Mga Selyo dinha, makita nila ang ilang ngalan dinha, ug magpakigsulti kanila ang Balaang Espiritu. Mangduol sila. Walay makapahilayo kanila; walay si bisan kinsa, wala ni usa. Mangduol gyud sila, bisan pa man, tungod kay ginapangunahan Mo man sila sama sa Imong pagpanguna niadtong gagmay'ng mga langgam, ug niadtong mga karnero, ug mga baka. Ikaw mao ang Dios! Tungod niadtong kaigmat nga anaa sa maong mga hayop, hingsayran nila nga kinahanglan gyud nilang mopahilayo! Ug kung ang kaigmat, nga anaa sa hayop, mahimo siyang pasidan-an nga mokalagiw gikan sa katalagman, unsa pa kaha ang angay'ng buhaton sa Balaang Espiritu para sa usa ka Iglesia nga nagaangkon nga puno Niini!



348 Dios, magmaloloy-on Ka kanamo. Pasayloa kaming tanan, Ginoo, sa among mga kakulangan. Dili namo gusto nga magatindog lang dinhi niini nga pulpito ug pasagdan kining mga tawo nga nanagtindog dinha palibot sa dingding, ug nanakit na ang ilang mga bitiis, ug pagkahuman mopauli na lang ug moingon, “Bueno, medyo okey na kana.” Ginoo, gusto namong aduna kami’y buhaton niini. Kami, gusto namo nga Imong susihon ang among mga kasingkasing. Kung aduna man kami og unsa man nga sayup, Ginoo, ipahibalo kanamo karon. Ayaw gyud tugoti nga modangat kami niana nga takna, dinha, nga ulahi na kaayo. Susiha ako. Sulayi ako, Ginoo.

349 Ania, ako nga nagatindog tungod sa grasya sa Dios, nga makita nga nabuksan na kanang Mga Selyo, ug mianhi, aron sultihan ang mga tawo. Sa diha nga, Imong gitagna na kini nga mahitabo nga mamaingon-niini, mga semana na ang milabay. Ug karon, Amahan, ania na Kini, mismo sa among atubangan.

350 Karon, Ginoo, sulayi ako. Susiha ako. Susiha ako, sulod sa kasingkasing ko. Ginoo, ayaw namo. . . Kami, gusto namo nga Imong tan-awon ang among mga kinabuhi. Ug kung adunay unsa man dinha, nga dili husto, isulti lang kini kanamo, Ginoo. Gusto namong tul-iron kini, karon mismo; karon mismo, samtang aduna pa’y Tuburan nga puno sa Dugo, samtang aduna pa’y usa—usa ka bleach nga makahinlo sa among mga sala ug mga dili-pagtoo. Gusto namong ilusbog ang among mga kalag sa kinahiladman niana; ang tanan namong dili-pagtoo. Dios, tabangi ang among dili-pagtoo; tangtanga kini gikan kanamo, Ginoo.

351 Gusto namong makadawat og makasakgaw nga grasya. Gusto namong mahimong may-kasarang, pag modalugdong na kanang misteryoso nga Dalugdog nianang tungora, ug pagalalinon na ang Iglesia, gusto namong mahimong andam nga modawat Niini. Ginoo, itugot kini.

352 Sulayi kami, Ginoo, pinaagi sa Imong Pulong. Patan-awa kami diha Niini. Ug kung makita namo nga napakyas kami. . . Kung aduna man dinhi, Ginoo, nga nabautismohan sa mga titulo ra; nga walay unsa man nga nahibaloan mahitungod sa matuod, og tinuod nga bautismo! Hinaut nga mamahimo akong ingon ka matinud-anon sama ni Pablo. . .

353 Sa dihang matapos niyang malatas ang kayutaan ibabaw sa Efeso, nahibalag niya ang mga tinun-an nga nanagsiyagit, ug nanagsinggit, ug nagkaaduna og mahimayaong panahon. Giingnan niya sila, “Nadawat na ba ninyo kung ingon-ana ang Espiritu Santo sukad nga mitoo kamo?” Wala gani sila mahibalo kon aduna ba’y Espiritu Santo. Ingon siya, “Kung ingon-ana sa unsa man kamo gikabautismohan?” Ug gibautismohan sila pinaagi niadtong mahimayaon, balaan nga propeta, apan sila’y gikabautismohan lamang ngadto sa paghinulsol. Dayon

gibautismohan sila pag-usab, sa Ngalan ni Jesus Cristo. Ug gimandoan sila ni Pablo nga magpabautismo, pag-usab.

Ginoo, pagkamaanindot nga maanaa sa Kahayag sa Imong Pulong!

<sup>354</sup> Ginamandoan ko ang tanang tawo, nga wala pa mabautismohi sa Ngalan ni Ginoong Jesus Cristo, nga magdali na paingon sa tubig, sa gilayon, samtang aduna pa kamo'y kahigayonan.

<sup>355</sup> Kamo nga wala pa mapuno sa Espiritu Santo; ginamandoan ko kamo, sa Ngalan ni Ginoong Jesus Cristo, pangluhod mo. Ug ayaw mo pagtindog hangtud nga bug-os kamong gihinloan sa Balaang Espiritu ug gipuno kamo sa Iyang gugma ug pagkamaayo; hangtud nga ang inyong kalag bug-os na nga natagbaw sa Presensiya sa Dios, nga ang inyong tibuok tinguha mao na ang alagaran Siya ug magkinabuhi alang Kaniya, ug mamuhat uban Kaniya, sa tibuok ninyong kinabuhi.

<sup>356</sup> Itugot kini. Nagaampo ako nga hatagan kamo sa Dios og kabug-aton nga buhaton kini dayon, sa Ngalan ni Jesus Cristo.

I love Him, I love Him  
Because He first loved me

Gihigugma ba gyud ninyo Siya? Karon ipataas ang inyong mga kamot.

And purchased my salvation  
On Calvary's tree.

<sup>357</sup> [Si Igsoong Branham nagsugod na sa paglaylay og *I Love Him*—Ed.] Kung aduna ma'y ania dinhi, nga nabati ang ilang panginahanglanon karong gabhiona, nabati nga gikinahanglan nilang mabautismohan, o nagkinahanglan sa bautismo sa Balaang Espiritu. Kabalo mo sa inyong panginahanglanon; napadayag kana kaninyo, ug kon gusto pud ninyong mahinumduman sa pag-ampo. Wala ni usa kanamo ang makahatag Niini kaninyo. Oh, mahimo namong bautismohan kamo. Apan, ang bugtong butang, dili namo mahimong mahatag kaninyo ang Balaang Espiritu. Ang Dios ang nagahimo niana, Siya lang. Apan kon nabati ninyo ang inyong panginahanglan, nga nagapakigsulti ang Dios sa inyong kasingkasing, nga gikinahanglan n'yo Kini, ug gusto n'yong hinumduman namo kamo sa pag-ampo. Mahimo ba nga motindog kamo, aron mailhan namo kamo, mailhan kung kinsa kamo? Panalanginan kamo sa Dios. Usa ka panginahanglan? Panalanginan kamo sa Dios.

<sup>358</sup> Sa hunahuna ko adunay usa ka gatus ug singkwenta, siguro, ang nagatindog dinhi. Tingali'g mga ingon-ana gyud, kung makita ko ang tanan. Wala ko kahibalo kung pila ang anaa sa sulod sa mga lawak, ug sa palibot sa gawas, nga ginapataas

ang ilang mga kamot, ug uban pa. Apan aduna gyud kamo'y panginahanglanon.


Karon mag-ampo kita.

<sup>359</sup> Karon, kamo nga nakakita niining mga tawo nga nagatindog tupad ninyo. Ug nagatindog sila sa pagsaksi, sa atubangan ni Cristo, “Ako—ako—gikinahanglan ko Ikaw, Ginoo. Gikinahanglan ko Ikaw. Ako—nagasalig ako nga usa ako—usa ako nianang makakaplag sa akong ngalan karong gabhiona luyo nianang Selyo dinha, nga nahisulat na Dinha sukad pa sa pagkatukod sa kalibutan. Adunay misantop sa akong kasingkasing, ug ania ako nga nagatindog, Ginoo. Ako ba kana? Ginatawag Mo ba ako? Gusto kong ipahayag Mo, kanako, ang akong ngalan Dinha. Pun-a ako, ug selyohi ako sulod sa Imong Kaugalingon, pinaagi sa Espiritu Santo.” Kamo nga mga naselyohan na pasulod, gusto kong motindog kamo. Lingia sila, ug ipandong ang inyong mga kamot diha kanila, aron iampo sila. [Mihunong si Igsoong Branham—Ed.] Karon magmatinud-anon gayud. [Nagasugod na sa pag-ampo ang tibuok kongregasyon.]

<sup>360</sup> Langitnong Amahan, sa Ngalan ni Ginoong Jesus, itugot ang Balaang Espiritu nga manglihok sa niining mga mananambong, maingon sa usa ka nagadahunog nga hangin, ug magtawag sa matag kasingkasing dinhi, Ginoo. Ug ipakunsad ang bautismo sa Balaang Espiritu, sa niini nga mga tawo.

Ug adunay tubig nga nagahulat.

<sup>361</sup> “Sa nagasulti pa si Pedro niini nga mga pulong, mikunsad ang Espiritu Santo kanila nga mga nagpatalinghug sa Pulong, ug napuno silang tanan sa Espiritu Santo.”

[Padayon nga nagaampo ang tibuok kongregasyon—Ed.] 

*ANG IKADUHANG SELYO* CEB63-0319

(The Second Seal)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Martes sa gabii, Marso 19, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)